

東
華
續
錄

東華續錄

同治五十六

臣王先謙敬編

臣張式恭恭校

三月庚申朔諭內閣前聞直隸藩司唐訓方於公事未能整頓惟候補道卞寶書之言是聽該道不知檢束有藉勢招搖情事諭令劉長佑詳查具奏茲據奏稱唐訓方履任以來於公事尙能實力講求惟每有精神未能周到之處道員用候補知府卞寶書久在直隸因接辦軍需總局並派查催直省積年交代晉謁該藩司之時較勤該藩司傳問接見該員亦較密人遂謂該藩司惟卞寶書之言是聽而卞寶書平日言動又有未能檢束之時諒訕之興多由於此此外查無實據等語卞寶書平日言動既有未能檢束之時自必確有實蹟昭著劉長佑雖代爲掩覆而該員平日居官任

事已可想見豈得謂人言盡屬子虛若僅將交代局差事撤銷暫行給假何以示懲儆而肅官方卞寶書著交部嚴加議處唐訓方任用屬員未能詳慎亦屬咎有應得著交部議處劉長佑於特旨交查之件宜如何切實覆陳乃僅稱唐訓方每有精神未到之處傳問接見該員之時較密又稱卞寶書平日言動有未能檢束之時含胡隱約語意頗涉瞻徇該督平素尙屬樸實不料沾染習氣如此之深著傳旨申飭尋吏部議上得旨卞寶書著降四級調用不准抵銷唐訓方著降二級畱任准其抵銷○諭李鴻章吳棠奏江北新漕遵辦河運將見辦章程開單呈覽一摺據稱上年試辦之船以東境汛後河乾至今未返以致人人視爲畏途必須優加體恤船戶樂從方可行之久遠見擬每米一石給水腳及神福犒賞等款銀六錢仍仿照海運沙船之例准於回空時裝載貨物免

交北稅並請飭倉場衙門嚴革陋規等語上年漕船回空停泊東境日久未歸若不量爲變通無以廣招徠而利後運著照該署督等所請每米一石給銀六錢並照海運沙船之例回空時准裝貨物免交北稅應如何給照稽查示以限制之處由該署督等妥議具奏所有經過山東直隸地方著各該督撫一體催趲毋任阻滯本年解運正漕運費較海運尤絀所有一切陋規自當永遠裁革恐丁胥經紀仍沿從前勒索幫丁之弊著倉場侍郎嚴行禁革隨時稽察如有需索苛求立予重懲務期漕政從此整頓運河可以暢行餘著照所議辦理尋議奏船戶免稅以裝米輕重價值科算如裝米三百石准帶土宜六十石回空時准帶成本銀五百兩貨物札令糧道督飭委員按船開單黏發護照以便稽查如所請行○諭軍機大臣等張亮基奏覆查覈害教民一案係募役司團首

任聚五與永甯州革役羅勝爲首任聚五等已在省監禁羅勝等
五名尙未弋獲擬先爲了結等語任聚五既係爲首要犯自當按
律先行定擬其羅勝等犯仍當飭屬緝拏遵照前旨早日結案以
免嘵嘵嗣後事關中外交涉必須處處持平固不可矯激沽名任
意將教民陵虐亦不可因其習教任令橫行鄉里魚肉一方於應
辦之案含糊了事蔡興槐既與胡縛理熟習卽責成專辦教案務
令悉心妥辦免致別啟釁端張亮基摺內有請召還京師賞給閒
散差使之語礙難允准若各省封疆大吏紛紛效尤乞予內召更
復成何事體該署撫既係三朝舊臣自應力爲其難以副委任將
此由六百里諭令知之○辛酉命五城煮賑展期兩月○壬戌諭
軍機大臣等吳昌壽奏張總愚股匪擾及東省追剿布置情形並
賴牛等逆竄入皖境一摺張總愚股匪被官軍在遂平擊敗北竄

舞陽鄆城禹州新鄭等處意欲搶渡黃河圖擾完善復經副將崔廷桂督帶水師礮船擊退宋慶善慶等軍敗之於中牟朱仙鎮賊遂東竄陳畱蘭儀擾及東省之曹州此股賊匪剽疾異常非東豫兩省合力夾剿不能杜其奔突會國藩見駐濟甯自應速調各路將士四面布置兜擊圍剿毋任他竄聞敬銘已銷假出省馳赴東平著劉營飭王心安潘鼎新等軍嚴扼運河防其東渡並與會國藩妥商籌辦分路兜剿迅殄狂氛丁寶楨交卸撫篆後卽著馳回省城嚴密防守毋稍疏懈吳昌壽已回沐省並派兵追赴考城著卽嚴檄宋慶安住保英等會合東省兵勇實力剿洗總以聯絡聲勢殄除股匪爲要不得存此疆彼界之見徒以驅賊出境爲了事沐省布置及防河事宜吳昌壽當加意防維不可稍有疏忽陳畱尉氏等處逼近大名地界並著吳昌壽隨時知照直隸防河文武

互相聯絡嚴密堵剿前經寄諭劉長佑布置河防著卽嚴督地方
文武偵探防剿毋稍大意賴牛等逆見竄阜陽喬松年當飭張得
勝等軍奮勇迎剿賴郡團練素稱得力並著激勵紳團到處堵截
以助官軍聲勢劉銘傳已率所部跟蹤追擊著會國藩檄飭該提
督與張得勝等軍前擊後追就地殲除不可縱令北竄致與張總
愚股匪合併又成滋蔓難圖之勢東省境內黃河防守事宜閻敬
銘亦當整飭籌備以免臨時竭蹶將此由六百里諭知會國藩劉
長佑喬松年間敬銘吳昌壽並傳諭丁寶楨知之○癸亥諭軍機
大臣等富爾琿奏省防稍鬆督隊出省探剿並擬暫裁殘廢官兵
半餉及關東軍務不可輕議招撫各摺片馬俊子股匪三千名盤
踞在灣甸子見有回竄開鐵及出邊滋擾之勢據富爾琿奏接據
文祥咨文已飭博崇武迅回開原並令富爾琿相機截剿等語卽

著文祥福興督飭博崇武等軍迅將馬傻子一股就地殄除毋任
出邊竄突前據丁寶楨奏李其昌帶兵向無紀律恐難得力擬改
派張得魁率勇赴奉當因捻竄曹考山東防剿喫緊諭令丁寶楨
將此項勇丁畱東調遣毋庸前赴奉天矣富爾琿惟當就見帶馬
隊實力搜剿不得徒事張皇有名無實從征殘廢兵丁給予半餉
原係朝廷軫恤戎行德意況軍興以來東三省徵調頻仍死亡相
繼其受傷成廢者給餉以養餘年所費亦屬無幾富爾琿請將六
十以下甘心自棄不來當差者所支半餉暫行裁汰之處雖爲節
省餉需起見而於國家優恤出力士卒之意未能體會是否可行
著富明阿體察情形具奏原片著鈔給閱看富爾琿所稱亂民不
可輕議招撫等語不爲無見著文祥等斟酌機宜妥慎籌辦原片
均著鈔給閱看嗣後富爾琿奏事總當與吉林將軍會銜具陳不

得專行發報以一事權將此由五百里各諭令知之○乙丑諭軍機大臣等德英奏據報次第收復外城暨截剿各處股匪獲勝一摺與寶善前奏大略相同北路三城收復後均無大員認真駐守辦理善後一切事宜著富明阿德英懷遵上月二十五日諭旨揀派得力之員分投辦理以期周密各路獲勝兵勇仍當飭令乘勝追剿毋任賊匪潛匿再貽後患德英另摺奏需餉孔亟請飭戶部迅將吉林自甲寅年起積年欠餉二十萬兩並本年約需俸餉銀三十餘萬兩如數籌撥並請由盛京戶部無論何款先行籌墊十數萬兩以資布置等語著戶部速議具奏盛京戶部庫內能否就近先行籌墊著文祥福興酌度辦理原摺著鈔給文祥等閱看將此由五百里各諭令知之尋文祥奏擬先撥銀二萬兩知照德英派員赴奉支領報聞○丙寅諭內閣前因劉昉楊能格先後奏稱

雷正綰部眾變亂回撲涇州經雷正綰極力阻截兵勇始回防所復據劉蓉奏稱拏獲叛將胡大貴供係雷正綰之弟雷恆及李高起等首先謀逆當經降旨令雷正綰將雷恆等解赴涇州交楊岳斌趙長齡訊明辦理茲據楊岳斌趙長齡奏稱訊據已革總兵雷恆等供稱上年八月間因雷正綰革去幫辦軍務心懷忿恨起意率領兵勇先到涇州向周顯承索餉乘勢直入西安因營官金占元不從將其殺害適已革提督胡大貴亦因失守城池恐雷正綰治罪遂與雷恆商議率同已革副將李高起同赴涇州嗣因雷正綰誓死阻攔兵勇逃回該革員等亦俱轉回防所各等語此案雷恆李高起胡大貴等膽敢因雷正綰革去幫辦軍務頓起逆謀沿途殺掠人民焚攻堡寨實屬罪大惡極業經楊岳斌等訊明將雷恆李高起正法梟示實足以彰國法而肅軍律胡大貴一犯卽著

劉蓉提出正法其餘同潰各弁勇均係雷恆等威脅所致情尚可原著一併免其查辦雷正綰入甘以後頗著戰功乃因金積堡失利不能自振咎無可辭惟於兵勇潰變之時以死自誓阻截亂軍且業將雷恆等交出訊辦尙知愧悔著加恩免其治罪仍責令整飭營伍實力勦賊以贖前愆營官金占元拒亂被戕頗知大節著楊岳斌查明請卹○諭軍機大臣等劉坤一奏江省各軍酌定留撤並暫留席寶田軍防勦閩匪及籌濟各省協餉一摺福建崇安縣齋匪焚搶釐卡戕官踞城竄至江閩交界之大安地方肆行焚掠劉坤一已飭席寶田由吉安酌撥所部兼程馳赴該處相機截擊卽著嚴檄該軍迅速前進越境攻勦並著左宗棠徐宗幹遴派官兵乘賊匪初起之時鼓行而前會合江省官軍兩面夾擊迅圖掃蕩毋任日久蔓延前據鮑超奏所部新舊馬步各營每月需餉

十三萬一千有奇請飭江西按月籌撥等語當經諭令官文曾國藩酌度情形奏明辦理茲據劉坤一奏江省兵燹之餘度支久匱目前勻撥京協各餉已形拮据勢難全數接濟擬每月協濟該軍餉銀四萬兩等語所陳亦係實在情形卽著咨商官文曾國藩酌定數目具奏席寶田帶兵向稱得力齋匪辦竣之後自應督率所部入黔剿賊未便遽准請假劉坤一當傳知該臬司勉力圖功以副委任將此由六百里各諭令知之○諭楊岳斌趙長齡奏查辦雷營倡亂之員訊明正法一摺本日已明降諭旨宣示並將被脅之員弁兵勇概予寬免雷正綰亦免其治罪矣胡大貴見在西安監禁楊岳斌等已咨令劉蓉將該革員就地正法卽著劉蓉趕緊辦理涇州軍營士卒經雷恆等正法之後順逆已明軍心當已鎮靜其被脅潰亂之將士見均邀恩免罪楊岳斌等當剴切曉諭令

其各釋危疑以安眾志將此由五百里各諭令知之○吳廷棟以病免調鄭敦謹爲刑部右侍郎李鴻藻爲戶部右侍郎以賀壽慈爲禮部右侍郎

由左副都御史遷

○戊辰諭內閣前因楊能格先後奏參

陝西參將周顯承把持侵蝕帶隊勒捐縱勇擄掠等款當經降旨將周顯承革職拏問交趙長齡會同楊岳斌查辦茲據將周顯承被參各節逐款嚴審定擬具奏此案周顯承原稟雷營潰變事屬真情並非架詞誣陷亦無狡詐把持侵蝕餉項等事惟勸辦軍糧帶隊前往以致勇丁騷擾實屬辦事鹵莽約束不嚴該員業經革職著責令隨營立功自贖以觀後效已革遊擊張潤槐雖訊無滋擾不法情事惟於裴輔晉私賣軍糧擅作威福責打捐戶等事徇隱不稟致令裴輔晉蒙稟周顯承檄使帶隊勒捐釀成巨案著從重發往軍臺效力贖罪千總王丕承帶領馬隊乘機搶掠同惡相

濟著革職發往黑龍江充當苦差外委羅玉爲勇丁引路肆擄雖中途折回究屬多事著革職逐回本籍已革把總裴輔晉擅資捐戶復敢蒙稟激成費端業經楊岳斌等訊明與不守營規姦擄斃命之隊勇王長興等先行正法梟示足以申軍律而昭炯戒記名提督劉正高於部下兵勇騷擾事前失於約束副將李鳳岡劉心灼遊擊王新元不能嚴馭勇丁致多擾害咎無可辭均著革職暫行留營效力儻不知愧奮卽著嚴參治罪候選知縣孟樹森遺失文案係因雷營潰變猝不及防且並非收支餉冊無關報銷署涇州直隸州知州林發深被參各款查屬不實均著免其置議○曾國藩奏據各路稟報張總愚大股由荷澤定陶擾及鉅野鄆城攻破鉅屬之太平寨圩盤踞該寨勢將渡運臣飭潘鼎新酌畱四營防守濟甯卽帶八營馳赴嘉祥鉅野相機剿辦另調湘軍三營自

徐州來濟換防騰出潘鼎新之軍馳赴前敵其自濟甯以上之開河袁口一帶水勢極淺爲該逆渡運熟徑丁寶楨以五千入分扼其間而親駐袁口督飭防範東省邊防之兵一爲曹縣金隄集楊飛熊之師一爲曹縣魏家灣王心安之師楊飛熊一軍在曹州之安與寨接仗先勝後挫王心安一軍在鉅野之龍堽集接仗挫損尤甚該兩將勇於赴敵身受多傷臣咨商撫臣將兩軍調赴運河以東憑河堵禦藉固北路之防該逆在太平寨盤踞四日潘鼎新出隊搗破該逆一見旌旗卽行退避三月初二日潘鼎新進攻太平寨該逆已全數北竄梁山有渡運之意運河汛地太長防兵太薄不知能否堵扼至李昭慶一軍由豫追賊入東已於初二日紮鉅野之章縫集少事休息卽會合潘鼎新之軍分道進剿或可以收夾擊之效任賴等逆一股由光息正陽一帶竄至頂城沈邱三

月十八日偪近槐店張樹珊冒雨出隊該逆折而南趨一日夜竄至江口集距槐店二百餘里劉銘傳緊躡賊後二十四日可抵太和周盛波聞該逆有回踞蒙亳老巢之信亦於二十五日由歸德馳赴亳州會合銘軍專辦此股臣上年屢陳四鎮之外另籌數枝游擊之師經營半載甫成劉銘傳李昭慶兩枝今捻逆西偪楚疆東趨海岱相去三千里馬步以數萬計官兵步多騎少每每失之遲鈍必須鮑超劉秉璋劉松山等多成數枝游兵庶足以布遠勢而圖全功臣見駐濟甯應卽在此就近調度俟東事大定再行赴豫上諭軍機大臣等曾國藩奏陳近日軍情暫駐濟甯調度喬松年奏賊蹤折竄皖境見籌剿辦閭敬銘奏東省防軍在鄆鉅接仗各情形王榕吉奏捻逆竄近晉邊飭在防文武固守各摺張總愚股匪由豫入東竄經荷定鉅鄆等城攻破寨圩楊飛熊一軍先

勝後挫王心安一軍挫損尤甚該逆日思渡運曾國藩見將兩軍調赴運河以東憑河堵禦以固北路之防惟運河汛地太長仍著添調兵勇招集民團合力堵禦毋任偷渡李昭慶一軍已抵鉅野卽令會合潘鼎新之軍分道進剿用收夾擊之效桂逆錫楨欲赴曲阜報仇該大臣檄調徐州楊鼎勳之軍赴東如賊已渡運卽徑赴曲阜護衛孔林賊未渡運卽駐紮聽調所籌均妥著卽飛飭照行閭敬銘摺內所稱飭濟東道衛榮光督率兵團連布北岸總兵趙三元礮船水師梭巡南岸均須實力辦理未可有名無實致涉疏虞任頤等逆由光息沈項竄至江口集有回踞蒙亳老巢之信周盛波已由歸德馳赴亳州會合劉銘傳一軍力辦此股曾國藩喬松年卽飭該提督等與英翰等軍扼擊於淮潁之交嚴防竄回老巢以固腹地鮑超見抵豐城本日已傳諭該提督速赴皖豫剿

賊著曾國藩再行催調並劉秉璋劉松山等均令各率所部前來
用作遊擊之師以期四面兜剿聚而殲旃該大臣卽暫駐濟甯調
度俟張總愚一股殄除再行赴豫督剿捻已東趨去晉日遠惟逆
蹤飄忽河防不可不慎王榕吉惟當與陳湜等悉心妥籌毋稍疏
忽賊匪全數北竄直隸防務緊要著劉長佑嚴飭各路防兵認真
戒備不得稍涉大意將此由六百里諭知曾國藩劉長佑喬松年
閻敬銘並傳諭王榕吉知之○諭前因曾國藩檄調鮑超一軍北
來剿捻並將該營餉需籌定有著之款嗣據鮑超奏該營月需餉
銀十三萬有奇請仍由江西籌撥亦諭曾國藩酌定奏明茲據該
督奏稱鮑超步隊過多擬令酌畱二十營月給額餉七萬兩其馬
隊令招募十二營月給額餉三萬兩又軍火車輜柴草之費月需
一萬四五千兩鮑超一軍有功於江西甚鉅惟以全餉十一萬數

千兩責之江西究恐力有未逮擬令江西月解七萬供霆營步軍之餉湖北月解二萬供其馬隊之餉江蘇月解二萬五千以一萬充馬隊口糧以一萬數千爲購買柴草車駝添補洋火藥馬匹之用等語所籌尙屬妥協劉坤一曾有月協霆營四萬兩之奏惟該營需餉甚鉅已令湖北江蘇分任該省自當力任其難該撫素顧大局此時該軍北來尤當不分畛域無誤要需嗣後霆營餉需卽著官文鄭敦謹李鴻章劉郇膏劉坤一按照此次奏定之數每月源源撥解以資飽騰並著官文鄭敦謹於襄陽設立該軍糧臺派襄陽道總司其事仍由江西派一委員駐臺支應步軍口糧湖北江蘇各派一委員駐臺支應馬隊口糧及洋火藥器械等事步軍欠餉將來仍由江西找補馬隊欠餉將來仍由湖北江蘇找補俾該軍得一意剿賊速蕲全功鮑超之軍前因餉需竭蹶不免騷擾

此時月餉有著該提督務當嚴明紀律俾軍行所至市井無驚以期終始保全令名用副委任該軍見在暫駐豐城而皖豫剿辦正當喫緊著卽迅速前進覘賊所向實力剿洗毋稍遲延至剿捻之師兵力已厚江閩各軍卽可毋庸再調著左宗棠劉坤一等卽將江閩各軍酌量分別遣撤以節餉需而靖民氣將此由六百里諭知官文左宗棠李鴻章鄭敦謹劉坤一並傳諭劉卞膏鮑超知之

○諭馬新貽奏福建崇安縣突被齋匪闖入派兵越境剿辦一摺據稱崇安齋匪於二月十五日闖入縣城勾結九龍山土匪人數甚眾該處與江西鉛山浙江江山等處相距較近見派兵越境剿辦與劉坤一前奏情形大略相同著馬新貽卽飭副將余朝貴等會同江閩各軍合力兜擊以期一鼓聚殲並著左宗棠徐宗幹劉坤一懷遵前旨遴派官兵迅速掃蕩毋任蔓延將此由五百里各

諭令知之○諭前因劉蓉奏參甘肅按察使楊能格各情疊經諭令楊岳斌會同趙長齡確查覆奏茲據奏稱楊岳斌將涇軍部署後卽馳赴慶陽嚴密查察趙長齡擬回西安候旨再赴新任等語楊能格被參之案本係交趙長齡會同楊岳斌查辦該撫毋庸折赴西安仍著會同楊岳斌查明該臬司糧臺收支各款有無浮冒侵蝕情弊據實具奏趙長齡俟此案辦結一面奏聞一面前赴山西本任毋庸候旨至涇州地方招集兵勇人數過多著楊岳斌妥籌布置毋令滋生事端將此由五百里各諭令知之○命唐訓方來京調鍾秀爲直隸布政使賞林壽圖三品頂帶爲陝西布政使

降調布政使

○己巳諭軍機大臣等文祥等奏官軍南北兩路剿賊疊

勝仍飭追剿一摺北路之賊竄至開原撫順等處經定安劉景芳等跟蹤追剿連獲大捷擒斬甚多餘匪翻山四散奔竄南路之匪

經劉榮合雙德等追擊於望城岡鳳凰城等處屢獲勝仗辦理極爲得手見存餘匪合計不及二千人著文祥等卽行督飭定安劉景芳等乘勝追剿一鼓殄除並入山搜捕餘匪以期一律肅清劉榮合所部楚勇旣與水土不宜著卽分別撤畱所發四月分餉銀免其扣還以示體恤馬傻子一犯旣已改裝潛逃著文祥等認真緝拿務在必獲此外儻有著名要犯潛蹤藏匿亦必須次第弋獲毋任漏網將此由五百里各諭令知之○諭本日據文祥等奏南北兩路剿賊獲勝各情業經諭知該尙書等妥籌辦理餘賊所存無多有定安等馬步各軍搜捕自可剋日蕆事前論文祥於布置妥協後卽行回京並密查都興阿能否勝任都興阿已經陞辭赴任該尙書俟其到省後詳加察看密速具奏如賊股漸完地方安謐卽可將各兵次第撤令歸伍善後事宜責成地方官經理伯彥

訥謨祜所帶蒙古官兵原以牽制賊勢輔兵力之不足該王帶兵在鄭家屯等處雖有斬擒並未撲滅全股本日列單保舉各員人數既多所請亦未免有過優之處念其身行間姑從所請降旨照准惟伯彥訥謨祜年輕望淺更事不多恐有受人蒙混之處見在吉林已無匪股該王所帶蒙兵諒可酌量裁撤著文祥通盤籌畫於應畱應撤之處詳察情形具奏候旨施行該尚書於東省事宜布置周妥卽著迎養來京照常供職以慰廕繫毋稍延緩將此由五百里諭令知之尋奏遵查吉林雖見無匪股然蒙兵同時並撤恐宵小聞而生心業經函商伯彥訥謨祜酌畱哲里木盟馬隊五百名派員管帶扼紮昌圖以固奉省北路門戶報聞○諭勞崇光奏起程赴省籌辦西征並歷陳激江臨安等府屬漢回官弁跋扈情形各摺片杜逆盤踞大理回夷人等皆遙倚該逆聲勢肆意

橫行必須翦滅渠魁始可削平寇亂勞崇光詳考輿圖悉心籌畫
剋期赴省督飭馬如龍等分道西征擬由楚雄府入手並於該府
設立糧臺以便採運供支所籌甚屬周妥滇省無督撫鎮壓已閱
三年該督毅然進省與馬如龍密商熟計自必申明紀律號令一
新著卽分飭各路將弁次第進兵督催馬如龍帶兵出省相機前
進該總兵以忠義自許必能率同楊振鵬等直抵大理下關力拔
堅城殄除巨逆劉嶽昭前已簡放雲南巡撫該督如慮兵力不敷
分布著卽飛催劉嶽昭迅速赴滇會商進剿則聲勢更壯剿辦自
易得手另片奏通籌全局不能不急行進省其故有五覽奏具見
忠藎之忱殊堪嘉尚該督更事多而慮事密朝廷方倚以辦賊豈
浮議危言所能搖惑勞崇光膺茲鉅任惟當振刷精神肅清疆圉
以副委任其澂江等府民強官弱武強文弱各情形若不逐加按

剔難免別滋事端自以不動聲色分別勸懲俾知感畏爲是一切均著照所奏辦理林鴻年畏憚無能業經革職伊前在昭通具奏摺片六件如摺內所稱楊盛宗勇而知理於迤西消息見聞較詳可資臂助等語著勞崇光酌量調遣其餘各片有無可採之處並著發交該督閱看斟酌辦理本日迤南道一缺已簡放岑毓英而藩司尙未簡放有人前亦有旨令該道署理其能否勝藩司之任著勞崇光仍遵前旨察看具奏將此由六百里諭令知之○諭勞崇光奏派員督剿鎮雄州進攻豬拱箐賊巢一摺貴州畢節豬拱箐地方苗號各匪踞爲老巢上年竄陷雲南鎮雄州並分擾彝良州同地方及昭通大關一帶蔓延甚廣若不亟籌剿辦勢將不可復制勞崇光見派岑毓英挑選所部五千人馳往先由彝良進攻次第規復州城卽著飭令該署藩司親督所部實力剿洗務將州

城剋期攻拔鎮雄距豬拱箐僅四十里必須兩省合攻方能制賊
死命並著張亮基嚴飭威甯鎮貴西道等文武各員厚集兵練與
岑毓英之軍約期夾擊一俟州城克復卽會剿豬拱箐老巢以期
痛殄逆氛痊渠堵穴該署撫務當振刷精神盡心疆事毋得遷延
觀望坐失戎機至四川永甯高珙一帶與鎮雄畢節等處犬牙相
錯時虞侵軼並著崇實駱秉章嚴飭該地方文武及防邊各軍扼
要嚴備相機兜剿毋任闖入將此由五百里各諭令知之○子雲
南被戕訓導華嶸吉林陣亡驛丞馬柏等祭葬世職○庚午諭軍
機大臣等德英奏分布兵勇按剿餘匪覆查收復各城請派員署
理副都統等缺並查明打仗出力各員開單請獎各摺片吉林西
南界連奉天圍場嶺麓叢雜餘匪易於竄匿亟宜布置周密方免
此擎彼竄之患德英見派役勇巡緝南輝河口並派礮勇三百餘

名在附省西南一帶圍場山邊扼要堵禦其岔路河西南一帶圍場山邊飭派佐領佛銘依克唐阿等會帶兵勇八百餘名分布堵禦卽著該署將軍嚴飭該將士實力巡緝搜捕以清餘孽前據富爾琿奏南路各股敗匪退入圍場大股賊匪在邊裏外灣甸子大輞子溝等處盤踞見在富爾琿已選拔兵勇馳往伊通卽著嚴飭該副都統相機剿辦並將逸匪馬傻子嚴密緝獲毋令死灰復然敗殘各路股匪務當設法邀截於圍場以外殄盡不可縱令入山致搜捕又形費手博崇武一軍已抵伊通文祥等咨令德英速飭博崇武所部馳赴開原惟見在伊通軍務亦關緊要該軍應否畱遣之處卽著文祥福興德英斟酌緩急辦理其長春等處防堵事宜卽著德英分派各兵實力籌辦收復東北三城德英見派員前往覆查並著嚴查該文武失事原由分別懲辦阿勒楚喀副都統

係德英本任德英著俟富明阿到吉林將軍任後穿孝百日俟孝滿卽赴本任未到任以前著富明阿先行派員署理伯都訥副都統著文祥於該二員內酌派一員前往以重職守雙城堡總管著富明阿派員署理前任阿勒楚喀協領富明阿一員前經富爾琿奏稱該員曾在軍營獲咎打仗亦不甚得力業已飭令回旗茲據德英奏保該員打仗出力懇請記名以副都統用事出兩歧卽著富明阿於到任後查明該前任協領富明阿打仗是否出力奏明請旨將此由五百里各諭令知之○諭李瀚章奏遵籌援黔諸軍分路進剿事宜並兆琛赴黔調員差委及貴東軍務請由兆琛奏報各摺片所陳楚軍援黔不在急求速效宜剿撫兼施先將貴東肅清再圖進剿等語尙合機宜卽著飭令兆琛及王永章李光燦李元度各軍合力進剿聯絡聲勢以期節節掃蕩肅清貴東席寶

田一軍前據劉坤一奏已飭赴江閩交界防剿崇安齋匪當經諭令侯齋匪辦竣卽率所部赴黔剿賊仍著劉坤一懍遵前旨催令於事竣後挑選精銳數千由黎平一路進兵與楚軍互相犄角至該臬司一軍餉需卽由江西按月轉解俾資飽騰兆琛見由沅晃馳赴鎮遠該處苗教充斥文報難通一切軍情卽著由兆琛自行奏報以免遲滯李瀚章另摺奏據兆琛詳稱黔省餉源枯竭請做照楚省黔捐章程委員前赴欠撥黔餉各省設局勸捐卽以捐銀作收該省協餉等語所陳尙屬可行著官文鄭敦謹崇實駱秉章瑞麟郭嵩燾劉坤一左宗棠徐宗幹馬新貽於黔員到後設局勸捐派委委員幫同辦理各該督撫務當不分畛域妥爲圖維不得稍涉膜視見在援軍已集不日卽可入黔張亮基當振刷精神督飭在事文武員弁實力防剿期與楚軍會合廓清全省以副委任

將此由五百里諭知官文左宗棠瑞麟崇實駱秉章鄭敦謹劉坤一馬新貽徐宗幹李瀚章郭嵩燾張亮基並傳諭兆琛知之○諭明誼等奏遵調蒙古官兵籌備伊犁馬匹一摺蒙古兵丁不知講習軍旅與內地營伍不同雖係實在情形但伊犁待援孔殷自須設法籌調以壯聲勢前諭該城派撥蒙兵六千名如萬不能足數亦須挑選精壯數千加意訓練以備折衝之用明誼等見已飭令各該扎薩克旗下每部落湊撥兵丁一千五百名並派該盟長副將軍等督率教練卽著趕緊札調來城聽候調撥明誼年逾七旬礙難遠征麟興年力正強卽著將調到蒙兵歸其管帶俟練習成軍卽統率前往援救伊城戰馬三千匹旣據明誼等如數備齊擬令明緒於該城曾經由俄境走過官兵內揀派多員來城協護免致別生枝節卽著明緒等迅速查照明緒酌派妥員迅來烏里雅

蘇台協同解送以免疎虞至伊犁待援情形萬分危急明緒坐困孤城奏牘中語言未免過於激切明誼等非但不必與之較量尤當思設法救援以期顧全大局烏科兩城當伊犁之衝防守事宜尤關緊要該將軍等務當加意豫防一面將蒙古兵丁勤加操練一面將本城防守先行妥籌布置不可稍涉大意明誼見因患病奏請開缺邊疆重地簡用乏人該將軍辦事素稱熟練著卽在任調理毋庸開缺一切操防布置事宜務當與車林敦多布等熟商妥籌以副委任將此由五百里諭令知之○王申諭軍機大臣等劉長佑奏東路捻氛逼近河干見飭水陸各軍實力堵禦喬松年奏皖軍擊賊獲勝各一摺捻逆入東境後在鉅野鄆城等處圍攻民墟逆騎四出距壽張河岸三四十里距張秋沈家口河岸亦止四十里該逆此次悉銳東趨勢將窺伺黃運兩河不思東竄卽圖

北犯亟應嚴密堵禦著劉長佑嚴檄官軍扼要駐守節節設防遇賊卽擊毋令乘間偷渡會國藩閻敬銘務當督飭各軍分路進攻將東省之匪就地殄除以免該逆四出北犯擾及畿疆直省南路如再有警報卽著劉長佑督帶馬步各隊星速出省擇要駐紮相機布置賴牛等逆經皖軍擊退復向豫省之新蔡光州一帶奔竄喬松年見飭張得勝等軍出境追擊卽著催令該員等會合劉銘傳所部協同勒洗兩面夾攻以收聚殲之效李鶴年前已陛辭著卽趲程前進迅赴新任未到任以前仍著吳昌壽督飭豫省防軍迎頭攔截杜賊紛竄爲次第廓清之計會國藩節制各省責無旁貸所有皖豫軍情該大臣當全局統籌妥爲調遣以副委任將此由五百里各諭令知之○于廣西陣亡州同李懋華建祠○甲戌諭軍機大臣等吳棠奏嚴防捻匪東竄情形一摺張總愚股匪竄

至山東曹縣旋竄定陶及鄆城交界地方該逆復欲句合賴牛等股由泰安曲阜折竄清江徐州並探聞賊至嘉祥金鄉逼近江境捻逆行蹤飄忽難保不乘虛東犯清江及邳宿運河南北兩岸在在需防該漕督已飭姚廣武等各率所分布清江及邳宿等處並飭徐海道張樹聲修整民圩派兵分駐徐州並防堵湖團王團布置尙屬周密卽著吳棠嚴飭在防員弁兵勇實力籌防毋稍疏懈至裏下河完善之區尤關緊要該漕督已就見有兵力嚴密防範並著俟劉秉璋督勇移紮宿遷之後與之熟商妥辦以固疆圉將此由五百里諭令知之○諭張凱嵩奏官軍續獲勝仗進攻山澤賊巢並豫籌辦理邊郡土匪情形各一摺山澤附近各村險隘林立經張凱嵩督飭各軍分路進剿疊破賊壘直逼腹心合圍之勢已成卽著嚴飭在事文武乘此聲威奮勇進攻擒渠掃穴迅速

賊事不得稍有疏懈南太鎮泗各郡伏莽徧地該撫擬俟山澤土匪剿平後卽簡精卒萬人分道疾驅相機剿辦先將巨股殲除設法解散餘黨以盜攻盜深合機宜卽著照所籌各節實心辦理以期肅清通省莫安閭閻至各該處牧令尤當慎選賢能以與吾民培養元氣庶戡定地方不至復萌禍亂是爲至要將此由五百里諭令知之○乙亥諭軍機大臣等吳昌壽奏賴牛股匪竄至中牟鄭州一帶調派各軍進剿一摺另片奏賊向朱仙鎮竄駛等語賴牛等逆自皖境阜陽全數折回由西華通許陳畱尉氏一帶竄至朱仙鎮折竄中牟經官軍奮力擊退賊向西北逸去盤踞鄭州白沙一帶見復由中牟回駛馬賊擾至省城南隄以外大隊疾趨向朱仙鎮一帶竄擾此股賊匪行蹤飄忽勢甚披猖省城見在隊伍不敷分剿甚屬可虞著吳昌壽將城守事宜嚴密布置飭令馬德

昭等軍相機追擊一面迅催宋慶蔣希夷安住保英等軍趕緊由東路折回探明賊蹤繞前迎剿賊竄朱仙鎮難保不東趨曹濟與張總愚合股會國藩務當分撥各軍與豫軍截擊毋令得遂其合併之計致成燎原直隸大名邊境與開封接壤尤須防其窺伺黃河希圖北渡著劉長佑添派兵勇與在防將士實力堵遏毋稍疏懈閭敬銘會商會國藩將黃運兩河要隘力籌防守毋得稍有疏虞山西澤潞等處本有防兵王榕吉仍當先事圖維豫爲戒備不得以賊蹤尙遠稍涉疏虞前據喬松年奏賊匪回竄豫境已飭張得勝程文炳等軍會合劉銘傳追擊卽著會國藩檄令劉銘傳等確探賊蹤迅速追剿盡殄賊氛李鶴年如已到豫卽著懷遵前旨妥籌防剿用副委任將此由六百里諭知會國藩劉長佑閭敬銘李鶴年吳昌壽並傳諭王榕吉知之○予陝西陣亡同知王璽知

縣玉鼎等祭葬世職○丙子諭軍機大臣等伯彥訥謨祜奏續獲各股首從開單呈覽德英奏截剿回竄逆匪奪獲礮位等件各摺賊眾經官軍擊敗後四散奔走改裝隱匿伯彥訥謨祜派令兵弁分路緝拏續獲多名軍前正法辦理尙爲認真見在邊外地方雖可稍安誠恐山徑叢雜餘孽潛滋著該親王仍卽督飭文武員弁會同地方官悉心搜捕以期一勞永逸俟地方一律肅清應如何分別撤兵歸伍之處與文祥等妥商辦理德英摺內所稱斃匪多名奪獲大礮一尊據賊供係搶自奉省 皇陵又奪獲繡黃黑色鐵甲各一副箭二枝等語奉省失去此項礮位等件從前未據奏報著德英卽將礮位鐵甲解送奉天查驗是否安放 陵寢之件著文祥福興詳查具奏未獲各匪仍著富明阿德英嚴飭兵練實力搜剿毋畱餘孽將此由五百里各諭令知之尋奏據 三陵總

管呈稱向無安放大砲及鐵甲箭枝等件應俟吉林解交奉省查明覈辦報聞○戊寅諭軍機大臣等富明阿奏遵旨前赴吉林起程日期及調員差委各摺片富明阿已行抵黑龍江省酌帶官兵西丹鄂倫春五百餘員名剋日赴吉卽著迅速前進將各股餘匪認真搜剿盡絕根株肅清疆圉此次派出牲丁應交貢貂著自出征日起暫行停納俟凱撤後再令呈交以紓丁力三等侍衛吉凌那斯渾著准其帶赴軍營以資得力已革副都統吉拉明阿已革三等侍衛吉勒圖善已革佐領特爾清阿及發遣廢員紹恆均著照富明阿所請自備資斧隨營效力儻仍不知奮勉卽著嚴參治罪將此由五百里諭令知之○翰林院檢討董文渙奏請飭內外臣工講求律例從之○飭山東河南山西等省迅解吉林欠餉○己卯諭軍機大臣等劉長佑奏捻逆屢撲河干被兵擊退並北路

邊防仍須兼顧麒慶奏奉省餘匪回竄清河門一帶滋擾防剿情形各一摺張總患股匪盤踞鄆鉅並由壽張縣南岸疊撲黃河均經直隸防兵擊退惟奉省紅黃藍三旗馬賊二千餘名竄擾清河門等處熱河官兵未能得手賊已擾及朝陽縣東界燒鍋地等處劉長佑見擬將直字中軍兩營仍畱北路並派英良會同黃仁遺帶領馬步兵勇數百名馳赴關外著卽覘賊所向會同熱河防軍實力剿捕一面飭令各關隘將士嚴行扼守毋令賊蹤乘隙竄入劉長佑俟抵大名布置河防周妥後察看情形如果南路捻勢稍鬆北路邊防喫緊卽著折回省城居中調度相機策應見據麒慶奏稱馬賊由清河邊門竄至熱河大板地方協領德玉穆濟楞與賊接仗因天黑未能獲勝退至孟古勒津駐紮見在添派協領瑞興等帶兵數百名馳往朝陽著麒慶嚴檄在事員弁奮力迎擊並

飭蒙古防兵一體會剿務將該匪就地殄除不得任賊縱橫漫無
布置賊匪本係敗殘之餘一入熱河邊境官兵卽不能制其平素
訓練之不得力已可概見協領德玉等有無畏避退縮情事麒慶
當切實查明辦理不可姑容諱飾致隳軍律近年奉天馬賊俱在
省城東南北三面肆擾疊經官軍擊敗殄除已十之八九西路一
帶久無賊蹤此次紅黃藍三旗大股賊匪究由何路突竄清河邊
門擾及朝陽著伯彥訥謨祜文祥等查明覆奏熱河地廣兵單恐
賊勢又成燎原著伯彥訥謨祜迅卽分撥所部蒙古兵丁折回西
面追至熱河會同該處兵勇剿洗文祥福興都興阿酌撥奉省官
兵一面馳赴熱河剿賊一面扼守錦郡義州邊境嚴防回竄以期
肅清邊界殄滅餘氛毋稍延緩將此由六百里各諭令知之○諭
劉長佑奏捻逆疊次竄撲河干均經官軍擊退一摺此股捻逆自

入東境後屢思竄渡黃河見徑直隸防軍擊退鄆城壽張已無賊蹤該逆見在竄向何處會函藩閫敬銘務當督飭各軍探賊所向實力迎剿總以繞出賊前偏令南趨俾李昭慶等軍得以兩面兜剿庶不至著著落後任賊擾及完善劉長佑見已前赴大名即著詳察各路情形何處應增礮船何處應添兵勇妥籌布置務臻周密其賴牛等逆既欲東趨勢將滋蔓劉長佑仍當懍遵前旨督率在防將士嚴密籌防遇賊即擊毋得稍涉疏懈擒匪竄朱仙鎮後見在情形若何並著吳昌壽隨時馳奏仍將防剿事宜及調兵回援各節妥速籌辦毋失事機李鶴年已否抵任並著恪遵屢次諭旨妥籌防剿以副委任將此由六百里各諭令知之○庚辰諭軍機大臣等穆圖善奏覆陳馬化澂投誠並甯郡回眾續繳軍械馬匹見在安插歸業各摺馬化澂復到營求撫穆圖善察其人尙誠

實著准其投誠責令前赴各路開導回民立功自贖如有頑梗不法仍當力加勦辦不得稍涉遷就致貽後患甯夏納家牖王家疇莊楊和堡等處回民一聞朝廷宣諭盡繳軍械馬匹礮位等項聽候安插尙知大義著穆圖善督飭敦奇祥阿等周歷各莊查驗令各歸各業及時耕種不得藉端擾累其認修渠工飭令認真辦理以期經久將此由六百里諭令知之○予安徽殉難訓導王福永孫法祖敘諭黃地元等祭葬世職○癸未諭軍機大臣等本日據楊岳斌馳奏省城兵變大概情形一摺覽奏曷勝焦急甘肅省城因糧餉缺乏督標兵丁竟於本月初三日五鼓擁眾至督署及軍需局搶劫並將督署幕友及畱省委員概行殺害該督畱省親兵百餘人均行被戕所存炸礮洋槍火藥並標營庫械悉爲搶盡連日緊閉城門肆殺官民被傷甚多城上皆爲叛兵安置礮位並句

結回逆赴省盤踞北關黃河對岸之廟灘此時賊氛猖獗占踞蘭州勢必全省震動楊岳斌亟應督兵星夜兼程馳回省垣速將蘭城克復以期力顧大局鎮定人心此外各路兵勇何處可以檄調卽著酌量情形先行撥往助剿以厚兵力楊岳斌於省垣重地並不小心防範以致標兵謀變毫無見聞咎無可辭著先行交部議處儻再慢無布置不將省城速行克復自問當得何罪林之望及省城文武各官下落著楊岳斌迅卽查明具奏平涼固原軍務情形見在若何該督作何布置並著隨時具奏涇防各營軍心已定楊岳斌自當分撥諸軍前往該二城相機剿撫毋令東路回匪聞風響應與省垣叛兵勾結致成燎原之勢仍一面設法疏通陝西糧運分濟甘省各營軍食毋稍大意慶陽查辦糧臺事務卽著該督專交趙長齡辦理所有慶陽畱防事宜仍著楊岳斌分派將士

嚴飭防守本日復據林之望奏稱副將羅宏裕辦理不善激變營兵一摺羅宏裕分撥各營糧米有無勇多兵少偏袒激變情事即著楊岳斌確實查明秉公嚴參懲辦不可稍涉徇徇以平軍心林之望此摺即係本月初三日所發所陳營兵僅稱因械鬪殺傷數人督署門尚未啟旋即解散與楊岳斌所奏情節迥不相符其所稱飭令各營照舊分守城門嚴防外賊窺城等語是否省城各門已爲叛兵占踞該藩司有無爲叛兵所脅飾詞具奏情事楊岳斌即行查明覈奏儻該叛勇偏脅藩司飾詞奏事難免不僞用印文分向各路軍營並各郡縣逞其詭計該督務當檄飭各該文武嚴密防察並著於回抵省城時設法將被脅滋事營兵先行招撫解散以孤賊勢務當隨機應變謀勇兼施不可稍執成見林之望原摺著鈔給閱看將此由六百里諭令知之○諭傳諭甘肅布政使

林之望林之望奏甘省營兵因軍糧缺乏向副將羅宏裕求撥糧食被其斥逐各營兵復與該副將之勇分訴忿爭彼此械鬪各殺傷數人見經林之望安撫解散等語甘省糧餉短絀自係實情惟該營兵等不應結眾忿爭遽思滋鬧且恐所奏尙有不實不盡楊岳斌見經出省所有省城防守事宜林之望豈能辭責著卽將各營兵丁妥爲彈壓查明爲首滋事之犯嚴行懲辦並籌措糧餉均勻放撥以定軍心一面嚴防城外賊匪勾結窺伺毋稍大意羅宏裕支放軍餉是否有辦理不公之處並著查明實在情形稟知楊岳斌嚴行參辦其餘一切應辦事宜著俟楊岳斌回省後妥商籌辦○諭前因伊犁待援孔亟曾經諭令明誼等調撥蒙古官兵六千名前往援剿茲據明誼等奏本處向無米麪附近又無處購買歸化城雖係產糧之區惟甯夏軍營及烏科二處口糧俱在該處

採買此次調撥蒙兵應需米麪若再由歸化城置辦實與彼處兵民生計有礙請飭山西巡撫派員採買轉運等語所奏亦係實在情形著王榕吉卽在該省內產糧處所轉飭該地方官趕緊置辦白麪六十萬斤市石穀米二千石迅速運至綏遠城交德勒克多爾濟差派官兵分起設法由驛押解赴烏以應征兵口食之需其所需價銀及裝盛口袋等項銀兩卽由前撥山西等省丙寅年地丁銀四十萬兩內分別扣留報部下餘銀兩並著一併解至綏遠城運解烏城分別轉撥將此諭知德勒克多爾濟並傳諭王榕吉知之○甲申會國藩奏任賴等逆自湖北回皖竄至江口集後二月二十六七八等日劉銘傳英翰各軍分路進擊疊獲勝仗該逆盡棄輜重竄過谷河狂奔而去我軍生擒百餘人中有賊目金添祿馬汰山二名官軍卽駐楊家圩左右劉銘傳以重兵在東料賊

必由西竄二十九日率軍前追行抵白菓園令各營停駐派幫帶官胡鳳喈率馬勇百名前探甫行二里許猝遇賊馬千餘來迎胡鳳喈且戰且退張景春率全部迎擊賊勢稍卻胡鳳喈勒馬回剿崔萬榮劉盛煒亦從兩旁包擊賊即回奔忽東忽西兩面出賊馬步二萬餘人分路來撲劉銘傳令黃桂蘭張士元兩營前往接應賊見步兵甚少拌死圍撲而以另股直撲親兵洋礮等營劉銘傳令畢乃爾等連開炸礮張勝琦等衝入賊中生擒數人賊氣始沮是時劉盛藻率所部由西鈔擊該逆乃棄黃桂蘭之圍併股迎之唐殿魁率所部並保成等馬隊亦由東繞擊而出各軍奮力齊進賊乃大挫奪路狂奔皖軍張得勝程文炳適從南路追來兩面夾擊共追殺二十餘里途中賊屍狼藉當查參將胡鳳喈於被圍時中槍殞命弁勇亦傷亡數十人該逆擊敗後一日夜即馳至槐店

張樹珊聞大股北趨之信三月初三日由周家口馳抵苑寨見賊馬渡過沙河遂令各營乘其不備一擁而進將賊隊截爲兩段其大股層疊踵至先以馬賊前來衝突我軍嚴陣以待用槍擊退隨派三營攻其左三營攻其右張樹珊親率正副兩營擣其中堅令馬隊直前衝陣該逆步隊萬餘人分股抗拒馬賊數千左右包鈔我軍槍礮齊施殺賊甚眾左路之賊於槍子如雨中冒煙死闕總兵王得勝直前殪一賊酋總兵董大義領隊衝鋒賊卻而復進者數次連用炸礮轟擊人馬紛紛倒斃賊眾散亂總兵宋立新馳入盪決各軍乘勢縱擊賊勢不支自辰至未殺傷千餘人該逆四散奔潰馬隊乘勢追逐維時賊之前股向周家口奔竄意欲攻撲老營守營副將張樹屏出隊迎擊張樹珊率師回顧首尾夾擊賊遂於周家口下流冒死擠渡窮力奔竄我軍追至日落始行收隊生

擒僞天將徐湄先一名僞福裕等賊目五十七名餘賊百餘名我軍亦微有傷亡是夕張樹珊挑選小隊至大朱樓地方乘夜襲擊該逆驚逃頗有俘斬初四日大隊繼出追至淮甯北鄉不及而還臣查任賴等逆兇悍異常一月之間馳突三省經該兩軍節次邀擊足以稍折兇鋒張樹珊一軍臣仍檄飭駐紮周家口以顧四鎮根本之地劉銘傳一軍則令尾追緊躡迅赴山東據報該軍已於十二日啟行十八日可抵定陶矣陣亡之副將銜儘先參將胡鳳喈千總劉得發均堪憫惜相應請旨飭部從優議卹以慰忠魂又奏三月初三日臬司潘鼎新率師至鄆城聞擒逆在潘溪渡屯踞該處跨河南北兩寨已被賊匪攻破其附近之孟家莊樊家樓等處一片逆氛初四日潘鼎新卽督軍分路進攻該逆分股來犯官軍槍礮齊施賊勢稍卻孟家莊等處援賊突至我軍三路奮進礮

無虛發該逆紛紛敗潰官軍奮勇追殺將潘溪渡南北兩寨立時攻克附近各莊之賊同時竄逸是日共計斃賊千餘名生擒二百餘人奪獲牲口數百救出難民三千餘人是夜該逆復陷踞蕭廳寨初六日潘鼎新率隊往攻至離寨八里之柳條園賊以馬賊徑前衝突我軍列陣以待槍礮連發馬賊敗竄步賊因之而靡萬國順等馬隊三營分路猛追賊馬忽從樹林後回撲如潮而來該三營卒然被挫直退至步隊紮處始行收隊李昭慶一軍自河南追賊而來行逾千里三月初五日馳抵嘉祥接潘鼎新函牘知大股逆匪去梁山不遠有急欲渡運之勢李昭慶酌留數營扼紮長溝而自帶八成隊進剿初七日未刻至蕭廳寨三里許賊卽出隊來迎李昭慶令隊伍分爲兩路排進相持兩時之久賊勢不支我軍乘勝擁入寨中之賊奪門而走立將蕭廳寨奪回李昭慶令各隊

排列寨前不許入寨移時賊果整隊回撲我軍向前迎敵賊勢佯敗我軍馬隊進逼過猛陷入賊中營官陳玉章中槍落馬親兵中營隨後接應被賊圍裹哨官裴兆宏吳坤田登時陣亡營勇傷亡過半李昭慶加派各營救應又派溫德勒克西等馬隊遊擊包鈔步賊漸退馬隊槍斃紅衣賊目一名營官王芝生砍斃黃衣賊目一名該逆始全行敗走遂解重圍我軍追至趙王河而返自是之後賊踞黑虎廟相持數日十二三日該逆遂漸西走已去百餘里似有回豫之勢臣以沿河水套一帶地勢沮洳屬各軍穩慎前進潘鼎新率隊跟追十四日行至鄆濮交界之紅川口適遇大股折回北竄潘鼎新率五成隊伍爲方陣以禦之該逆以馬隊三起猛撲步隊繼進我軍奮勇逼壓截其尾隊擒斬三十餘人十五日張逆回至黑虎廟一帶邊馬及於運河西岸擾犯沈家口安山等處

亟圖搶渡閭敬銘督率東軍認真堵禦其任賴等逆亦卽於十五日竄入曹州圖與張逆合併數日以來張逆萃於濮范境內任賴萃於鄆鉅境內臣慮潘鼎新孤軍深入前後受敵已將該軍調回靳口兼顧運河北路令李昭慶各營分屯長溝趙村兼顧運河南路目下但爲堅守之局與該逆力爭運河使不得東以待援軍之至劉銘傳一軍由湖北躡追任賴等逆二千餘里十八日可抵定陶周盛波一軍由歸德帶隊追賊十七日已至曹縣劉松山一軍臣飭先其所急十八日由湖團啟行不日可來濟甯應俟各軍先後到齊再行會商進擊楊鼎勳一軍行抵鄒縣臣以曲阜無警與閭敬銘往復函商檄令改赴韓莊入牐一帶以防運河下游上諭軍機大臣等見在張逆萃於濮范境內任賴等逆萃於鄆鉅境內該大臣見將潘鼎新軍調回靳口兼顧運河北路令李昭慶各

營分屯長溝趙村兼顧運河南路堅守運河使該逆不得東渡以待援軍之至劉銘傳等軍業已陸續到東著俟各軍到齊四面分布先爲不可勝以待敵之可勝務須謀定後動計出萬全方爲至善此股逆眾合併一處兇狡異常會國藩閩敬銘務當嚴飭各軍固守運河毋任一賊偷渡各軍到齊自可一戰而勝惟賊數尙多必圖分竄皖豫各境著喬松年李鶴年吳昌壽各飭防軍認真截擊節節殲除毋稍疏懈近來各省積習近賊地方不爲備禦賊至則張皇請救及援軍獲勝或反據爲己功賊退出境旋報肅清累疏請保冒濫實多如湖北河南今春屢報勝仗風聞實無戰事黃陂之役非劉銘傳速到何能攻拔城池而官文等奏報鋪敘本省戰功殊多失實前據官文等奏請擇尤保獎已降旨允准著暫行存記俟此股賊眾剿除淨盡再將防軍酌保仍不准稍涉冒濫嗣

後該各省督撫務當據實奏報不准有一字欺飾於地方軍務隨
事覈實信賞必罰庶足以挽積習而勵戎行鮑超一軍行抵何處
著官文會國藩嚴行檄催前據御史張盛藻奏湖北荊州地方有
署同知劉姓擅設餉稅各目多爲科條大張告示人情洶洶罷市
數日請飭禁止等語著官文會國荃查明劉姓何人是否因抽稅
擾民據實參奏原摺著鈔給官文會國荃閱看將此由六百里各
諭令知之尋奏遵查宜沙兩處加抽餉釐係因鄂省協餉太多前
撫臣鄭敦謹委員試辦由牙釐總局覈議章程並非該員擅設商
民始雖觀望旋經開導如期抽收並無罷市情事報聞○諭劉坤
一奏擊散崇安齋匪見籌按捕情形一摺福建崇安齋匪由建陽
崇邑竄至江西上饒縣屬經都司高鍾奇掩擊斃賊數百名解散
協從二三千人復經參將王益隆與提督黃少春夾擊擒斬三百

餘名餘匪遁往鉛山向溫林關繞竄著左宗棠徐宗幹嚴飭各軍併力截擊並著劉坤一督飭副將余朝貴協力攻剿扼其回竄務須一鼓殲擒不使稍畱餘孽其逃散匪黨潛匿江閩交界之封禁山及上饒鉛山者爲數尙多劉坤一擬將席寶田所撥三千人駐紮廣信彈壓卽著飭令嚴密接捕務絕根株並責成該地方官認真查拏此外各府州縣如有喫齋立會等事尤須嚴爲禁絕以遏亂萌其江西裁撤各軍爲水所阻畱滯吉安兼有游勇溷迹著責成席寶田妥爲鎮撫毋使滋事席寶田前有旨飭赴臬司本任著俟齋匪辦竣各軍調回後再由劉坤一斟酌奏明辦理鮑超一軍會否由江起程見在捻髮等逆蜩集山東范濮鄆鉅之交軍事萬分喫緊著劉坤一行知該提督星速拔營前進毋稍遷延貽誤將此由五百里各諭令知之○諭王榕吉奏晉省南路邊防喫緊分

籌守禦情形請飭穆圖善將原調晉兵遣回各摺片據稱陳大漕股匪由新鄭鄭州竄至鞏汜及偃師之間距洛陽僅七十里河陝一帶並無重兵陳湜見帶勇隊由運城移紮河干蔣臨照馳防東灘渡封門口各要隘冀甯道鈐祥與鄧玉生分防潞澤一帶布置尙屬周密此股賊匪疊據會國藩閻敬銘先後奏到已竄至郛城以北與張總愚合股廣集東境惟逆氛剽疾靡常晉防不可稍懈著王榕吉豫飭在防各軍多設偵探嚴密布置務臻穩固毋稍疏虞前因王榕吉奏晉省河防兵單請調同赴甘助剿之楚勇千名會諭都興阿酌量調撥茲據該護撫奏稱晉防喫緊如前項楚勇業經飭赴前敵卽請將原調晉兵八百名遣回等語見在甯夏回匪投誠兵力諒敷分布惟蘭州省城兵變又虞各處響應著穆圖善酌量情形如兵力已敷卽將此項晉兵八百名遣回本省以資

防剿將此由四百里諭知穆圖善並傳諭王榕吉知之○予安徽等省陣亡參將劉鳳階遊擊胡榮清劉洪盛等祭葬世職○乙酉諭軍機大臣等總理各國事務衙門奏據崇厚函稱奉省馬賊於三月初九日竄至牛莊遽行失守距營口九十里該處驚惶之至沒溝營地方爲稅課攸關額設防兵單薄萬一有警所繫非輕兼之洋商聚集儻有疏虞必致藉口虧折請飭撥兵防護等語牛莊爲海口要地此股賊匪從何處竄入詳細情形何以尙未據文祥等奏報著卽查明具奏一面分撥兵勇移緩就急相機進剿以安商旅而裕稅課天津洋槍隊本爲保護營口之用嗣因奉省緊要經文祥等奏調赴興京防守著文祥等悉心酌度如興京無事卽將春霖所帶洋槍隊五百名調赴營口仍另撥得力將弁迅速往援崇厚一面籌防南路髮捻一面將天津所練洋槍隊酌量分撥

數百名配齊器械委員統帶前往候調前據文祥等奏奉省馬賊已屬無多不難次第剿乃本月二十日據麒慶奏奉省紅黃藍三旗馬賊二千餘名竄擾清河門等處擾及朝陽東界昨據德英奏馬傻子股匪數千人有四月出山至伊通報復之說今牛莊又有匪徒竄入尙不知爲數若干是賊匪此拏彼竄雖屢次被剿窮蹙而人數尙屬不少文祥等務當多設偵探通盤籌畫以蕲全功都興阿見已到任該將軍久歷戎行應如何分投布置之處著與文祥福興隨時會商辦理本日復據劉長佑奏由清河門竄朝陽股匪見仍折回奉省並有向花營投誠之信此股賊匪會否接仗何以遽肯投誠所稱花營是否花里雅春軍營著文祥等確查奏聞將此由六百里各諭令知之○諭劉長佑奏張逆回撲河干疊經防軍擊退賴牛各逆復謀搶渡一摺張逆由開州壽張張秋范

縣等處疊思搶渡賴汶洗牛落紅各逆竄入鄆境與張逆句合由
濮州臨濮一帶竄踞范縣之董家樓等處官軍雖屢次獲勝惟見
在髮捻合股難保不逞其狡謀爲併力渡河之舉劉長佑已赴大
名著卽嚴飭在防將士晝夜梭巡遇賊卽擊以固河防其南岸船
隻盡行提歸北岸毋令該逆乘機搶船得遂其北渡詭計沿河防
兵單薄應如何添調勁旅相機布置之處著劉長佑酌度情形妥
爲辦理將此由五百里諭令知之○丙戌兵部尙書軍機大臣曹
毓瑛卒賞銀二千兩治喪予祭葬諡恭愍○以董恂爲兵部尙書
汪元方爲左都御史調譚廷襄爲戶部左侍郎王發桂爲工部右
侍郎轉鄭敦謹爲刑部左侍郎以桑春榮爲刑部右侍郎由內閣學士遷
○以胡家玉爲左副都御史由大理寺卿遷○丁亥諭軍機大臣等左宗
棠徐宗幹奏收復崇安建陽兩城派軍會剿齋匪一摺齋匪竄陷

崇安建陽兩城夥黨甚眾經左宗棠督飭黃少春等軍會合江省官兵乘其初起迅速進剿即將崇建兩城克復福建境內業已肅清辦理尙屬妥速惟此股齎匪起自江西封禁山藏匿已久見在生擒賊匪尙不知大頭目名姓其蹤迹詭秘已可概見若不嚴行搜捕盡絕根株誠慮因官軍凱撤復出滋擾著左宗棠徐宗幹督飭黃少春等越境躡蹤追捕劉坤一懷遵前旨嚴飭副將余朝貴等會同閩軍務將山內齎匪伏匿之所認真搜捕毋畱餘孽其竄九龍山一股業經閩軍擊斃首匪陳仕城其餘夥匪並著左宗棠等督飭地方文武實力搜剿以期速行肅事將此由五百里各諭令知之○諭蔣益澧奏起程赴粵日期並擬酌帶親兵前往一摺廣東民俗強悍降眾散處伏莽徧地搶擄各案層見疊出江西土客械鬪成風蔓延日甚該撫到省後務當整頓營伍講求吏治並

選擇賢能地方官實心經理中外通商各要口事宜尤須與瑞麟和衷商酌體察時事艱難以期顧全大局提督高連陞所部多係降眾將弁中亦鮮能事之人於地方辦理土匪事宜未能應手該撫擬於酌帶親兵數百人外再添帶部勇數營赴粵藉資分布著卽照所擬辦理俟粵東通省肅清後再行酌量裁撤粵東餉源枯竭蔣益澧以該省前會協濟浙江軍餉並籌發該撫一軍援浙餉銀三十餘萬兩見擬暫由浙省籌銀一二十萬兩移濟廣東目前之急著馬新貽卽行設法迅籌接濟不得稍分畛域卓興方耀所部勇丁業已陸續裁撤所欠之餉務須設法覈實清理不得任其虛冒將此由五百里各諭令知之○予福建殉難知縣申其昌等祭葬世職○戊子以孟夏時享 太廟 上前期親詣行禮○諭軍機大臣等崇厚奏遵撥洋槍隊聽調並探聞各路賊情一摺牛

莊竄賊無多文祥等諒已撥兵前往不難一鼓殄除南路髮捻急圖渡運不可不防其竄突著崇厚將所備撥洋槍隊等官兵移防南路應行駐紮何處仍遵二十七日諭旨與劉長佑妥商調派以臻周密賊日穆春榮王振東赴花里雅春軍營投誠並招馬傻子投誠繳械見由花樓子取道廣甯赴省分別辦理著文祥福興都與阿查明馬傻子是否真確投誠人數既眾必須於省外分別安置察明真偽妥爲籌畫受降如受敵未可稍涉大意致蹈恩合覆轍牛莊賊股與花樓子賊眾投誠情形尙未據文祥等奏報著卽將詳細情形奏聞以慰馳廛本日據福興等奏協領穆錦等供詞狡展一摺穆錦等所供招撫情形已屬乖謬所稱動用盤費銀兩又與集爾哈布等所報款項數目均不相符穆錦等承領餉需借支捐項及起獲賊贓爲數甚鉅乃率稱接仗遺失無憑稽覈難保

非藉端蒙混任意狡展己革水師營協領穆錦暫革主事喬有年
均著交盛京刑部嚴訊確情從重定擬前該金州副都統集爾哈
布同知唐恩壽一併撤任聽候傳實務期水落石出以成信讞將
此由五百里各諭令知之○以朱蘭爲內閣學士由詹事遷○命戶部
右侍郎李鴻藻在軍機大臣上行走右副都御史胡家玉在軍機
大臣上學習行走○是月蠲免奉天新民等十二廳州縣被擾本
年額賦租課有差

夏四月己丑朔安徽官軍攻張寨瓦店各賊巢克之○庚寅諭軍
機大臣等文祥福興奏連日分路剿賊情形並查明西路賊匪各
摺片北路馬傻子敗匪經花里雅春等追擊窮蹙率眾投誠該匪
係著名巨逆豈容幸逃顯戮文祥等見在檄令該副都統等將馬
傻子等匪首悉行正法辦理甚屬認真餘匪果係真心投誠必須

詳察情形分別遣囑業經文祥福興會商都興阿飭令色爾固善於路過該處時設法辦理卽著都興阿等相機妥辦南路之匪乘閒竄陷牛莊業經劉景芳等會同雙德兩路夾剿賊向東北山內竄逸當將牛莊收復著卽檄令各軍盡力窮追務將餘匪悉數殄除毋畱餘孽其吉林圍場竄出匪眾二千餘名分股竄擾新兵堡灣甸子及單家五臺子等處亦經文祥等飭令清凱等分路剿辦卽著嚴督各軍會同吉林官兵認真搜捕一鼓殲除毋令餘匪逃匿山內又致死灰復燃前因麒慶奏賊由清河邊門竄至熱河大板地方協領德玉等退至孟古勒津駐紮當經諭令麒慶查明該協領等有无畏避退縮情事奏明辦理茲據文祥等奏稱西竄餘匪不過數百名德玉穆濟楞統領馬步八百名接仗失利侈稟馬賊二千餘名希圖掩其潰敗之愆麒慶何得不審虛實張皇入告

著仍遵前旨詳查德玉等失事情形嚴行參辦並著嚴飭在防官兵會同奉天派出各軍奮力勦賊以贖前愆將此由五百里各諭令知之○諭長善奏山海關防勦官兵不敷差遣請調員來關助勦一摺本日據文祥等奏前竄朝陽股匪已向花里雅春軍營投誠是關外情形較鬆長善所請酌撥馬勇數百名交劉榮合統帶赴關外防勦之處著劉長佑酌量緩急妥籌辦理如直隸派兵赴關其所需一切兵餉薪水等項卽著由直隸省隨時籌給以歸簡易關外緊要處所仍著長善督飭在防將士嚴密防守毋稍疏懈正在寄諭聞據劉長佑奏東西兩路官軍堵勦情形並請保防河出力人員各摺片搶渡各匪疊經官軍擊敗當將舊范縣等處收復張賴各逆先後復竄鄆曹一帶濮范壽張無匪堵禦尙屬認真卽著劉長佑嚴飭水陸各軍實力嚴防不得以賊蹤稍遠致形疏

懈該督已抵大名卽親赴開濮等處將河防各軍分別布置務臻周密在防員弁兵勇紳團均能奮力堵賊未便沒其微勞卽著劉長佑會同李鶴年擇尤保奏毋許冒濫將此由四百里各諭令知之○諭閻敬銘奏捻逆疊撲運河分股南竄官軍擊剿大勝一摺張賴各逆經官軍痛擊悉向南趨運防自己稍鬆然賊騎飄忽難保不復思回竄所有運南運北一帶防軍仍著會同藩閻敬銘飭令認真防守毋稍疏懈劉銘傳一軍見已緊躡賊蹤同南跟蹤賊匪迫於追師勢必分股狂奔單縣東南一帶可達豐沛西南一帶卽係豫境均須有攔頭截擊之師方可合力兜剿會國藩吳棠務當督飭徐州等處防軍遇有賊蹤奮力堵剿毋任狂竄李鶴年見已抵任著卽嚴飭蔣希夷馬德昭等軍確探賊由何路回竄迎頭截剿毋得任令闖入腹地復致蔓延見在該逆趨向未定宿亮一

帶亦應先籌布置著喬松年派撥勁軍嚴密防剿毋稍大意聞敬
銘另片奏到任已屆三年籲懇入覲等語見在山東軍務正當喫
緊該撫當實力籌辦毋庸來見俟東省肅清再行奏請本日復據
李鶴年奏探聞賴牛等匪由定陶荷澤向東北竄逸又有回竄安
徽之謠等語自尙未知該逆已於二十四五等日向單縣南竄賊
蹤奔突靡常豫省歸虞一帶闌入堪虞著李鶴年卽飭宋慶安住
馬步各軍視賊所向相機防剿不得株守一隅致誤事機其餘豫
省各軍並著認真整頓妥籌布置務臻周密將此由六百里各諭
令知之○諭傳諭甘肅布政使林之望林之望奏再陳省標兵丁
索糧激變詳細原委並地方危急情形請旨迅賜查辦及越分陳
奏自請察議各摺片甘肅省標各營兵丁因平日楚勇餉厚差輕
積懷不平又以飢餓索餉爲署副將羅宏裕喝斥激成變端自係

實在情形惟該兵丁等與楚勇械鬪竟將道員吳炳崑等戕害實屬不法著林之望迅速查明將爲首滋事之犯嚴行懲辦其餘被脅各營並著曉以大義告以叛逆之人無不誅滅之理洪逆倡亂竄踞金陵馬榮叛踞雲南省城見俱次第剗削全數誅夷況甘省標兵本屬無多指日楊岳斌統兵回省儻不及早擒縛首逆解散黨與將來大兵一到必至玉石俱焚該兵丁等如能悔過自新朝廷亦當寬其既往不事窮究也賊騎千餘直抵黃河北岸距城止一二里省城防守緊要林之望當約束各兵嚴行守禦不得稍有疏虞參將馬福遊擊陳應春等是否足恃中軍副將各缺林之望見派何人接署片內未將該員等姓名敘明殊屬含混均著詳細覆陳被戕各官並著一一查明具奏此次省城兵變督臣出省林之望未能先事豫防實難辭咎著先行交部議處近日省城防守

情形楊岳斌未到以前仍著林之望隨時據實馳奏尋奏中軍副將趙秉鑑先期出省辦糧兵變後卽催調回任城守營遊擊各缺委陳應春易滕甲馬福馬繼祖德恩署理該員等熟習營務任事後均能實心實力共維大局已令將爲首滋事兵丁按冊密拏懲治被戕各官查係道員吳炳崑知府崔學敏等十四員名報聞○諭據劉蓉馳奏甘肅省城兵變情形酌籌緩急權宜辦理並將林之望此次馳奏摺件由驛遞呈一摺與朝廷所辦情形多相符合蘭州文武各員多爲叛兵戕害四門已設礮位閉守林之望兩次所奏摺件顯係被脅捏飾劉蓉以楊岳斌移師回省恐各路回逆併起以躡其後前阻堅城後迫強寇糧道中梗非制勝之策請先將平固壩蕩疏通糧路然後鼓行而西不宜以孤軍憤進等語所奏亦不爲無見此事本由楚勇與標兵領餉厚薄不均楚勇又從

而陵蔑之以致標兵積不能平劣將張玉春等從中播弄遂致斗生變亂楊岳斌當分別首從勦撫兼施不得概行殺戮致叛兵聞風畏懼益堅其抗拒之心並須將偏袒不公之武員查明參劾以平其心此等叛兵倉卒起事急則合而緩則分總宜設法解散以省兵力省垣城池堅固洋礮火藥均爲叛兵所擄該督當自度兵力如何儻能剋期克復則兵貴神速自應迅回省城辦理如探明賊中守備已固兵力未能遽克或如劉蓉所籌先將平固回匪勦平疏通糧路再行西進之處均著楊岳斌酌度緩急情形辦理林之望此次所奏摺件詞旨與前次所陳大略相同其所稱督標各兵與楚勇不能同處省城請令曹克忠帶所部赴省等語是否叛兵有悔罪望撫之意抑或欲誘曹軍入城圖謀戕害楊岳斌當密訪明確相機調遣不可坐失事機亦不可冒昧從事林之望摺一

件片二件均著鈔給楊岳斌閱看傳諭林之望旨一道並著鈔給楊岳斌劉蓉閱看劉蓉另片奏請於林之望摺報過境時由該撫先行折閱以便豫悉情形真偽著暫照所請行如楊岳斌業已抵省劉蓉即可向楊岳斌詢問情形不必再行折閱林之望摺報蘭州城內無糧楊岳斌當分兵要路杜賊勾結外援斷其糧路勢將不攻自潰將此由六百里諭令知之○辛卯諭軍機大臣等曾國荃奏查明湖北營務大概情形擬請添調良將整齊兵勇以收實效一摺鄂省與豫皖毗連捻匪一日不平則鄂防一日難弛惟該處兵數雖多而將領不得其人有守禦之名無整軍之實安靜之時多糜餉項寇至之日無計決勝自應裁兵併餉選擇良將分營統領以期壁壘一新同心禦侮所有曾國荃請調之記名布政使劉連捷前福建汀漳龍道彭毓橘前河南歸德鎮總兵朱有桂福

建陸路提督郭松林見在湖南原籍卽著李瀚章飭令該四員卽日前赴湖北聽候官文曾國荃調遣不准稍有耽延至朱南桂劉連捷二員前經楊岳斌奏調赴甘曾經諭令李瀚章飭令前往該員等因病暫緩起程見在甘肅省城兵變軍事方殷如鄂省營務整頓有效接統有人卽著官文曾國荃斟酌情形令朱南桂劉連捷仍遵前旨赴甘毋稍遲誤安肅道蔣凝學回湘募勇已逾半載計已成軍何以久無消息並著李瀚章催令迅速啟行鄂省節餉練兵各事不外嚴覈勇數申明紀律官文曾國荃務當振刷精神認真經理新裁十三營尤當善爲遣散毋令藉端滋事將此由五百里各諭令知之○定五城團防保舉限制○王辰安徽巡撫喬松年奏賊竄東境見調張得勝程文炳兩軍回顧皖防得旨該匪已竄擾單縣地方勢漸南趨皖防不可稍鬆喬松年當嚴飭各軍

奮力追剿毋令闖入皖境○甲午諭內閣劉蓉奏辦理墾荒事宜請酌定考課舉劾章程一摺陝西當兵燹之後沃土久荒民力重困地方官自應以招徠開墾爲急務乃該署撫於上年設局刊發章程以來各州縣非有意含混冀便私圖卽假手吏胥虛應故事若非嚴行考覈何以昭勸懲而收實效劉蓉所擬勒定限期趕緊辦理查明該地方被災之重輕荒產之多少墾種之成數分別勸懲及責成該管府州督率考課各章程尙屬周妥卽著照所擬辦理該署撫務當督飭所屬實力奉行嚴密考察秉公舉劾期於實惠及民歷久無弊另片奏籌辦營田事體繁重請調員襄辦等語四川候補知府唐炯著准其調赴陝西襄辦營田事務以資得力○諭軍機大臣等劉蓉奏甘省逆回東竄派兵會剿並靖邊等處防軍剿賊疊勝各一摺西路大股賊匪馬隊數千挈眷東竄勢將

由蓮花城故關隴州一帶入陝楊岳斌已飭譚玉龍派隊剿捕劉
蓉復檄令蕭德揚等各率所部就近堵截添派邱時成等兩起馬
隊馳赴鳳隴會同涇防各軍相機截擊卽著該督撫嚴飭在防將
士實力兜剿悉數殲除不得稍有鬆懈任令竄越靖邊等處防軍
截剿竄匪疊獲勝仗尙屬出力惟該匪糧食缺乏時圖竄陝見在
各路股數及木瓜城一帶盤踞甚多均踞陝邊不遠劉蓉務當飭
令段登雲及鄆太愚等嚴密堵剿以固疆圉毋稍疏虞金積堡靈
州一帶陝回竄踞平固楊岳斌前由慶陽折回見在行抵何處著
卽督飭諸軍將平固兩城迅圖克復毋令久踞省垣近日情形如
何該督作何辦理之處並著隨時馳奏以慰廑注將此由五百里
各諭令知之○以兵變疏防鐫楊岳斌林之望級仍畱任○乙未
諭軍機大臣等傳諭甘肅布政使林之望林之望奏近省回匪環

伺省垣請飭催官軍進援並軍糧缺乏及省東官軍接仗情形並代奏標兵訴詞各摺片甘肅省城兵勇互鬪後北路回匪馬士彥等率眾逼近省垣西南各路賊首馬阿渾謝二崔三等亦四出紛乘意圖窺伺因城守嚴密均以乞撫爲詞暫行撤退林之望因內無糧草外無援兵權宜安輯固屬萬不得已之舉惟回性狡詐每以投誠懈我軍心林之望仍當督率在城文武加意防範不得稍涉疏虞致墮詭計張玉春等三營業經林之望調回省城駐紮要隘第爲數過少尙不足丕振軍聲前已諭令楊岳斌飛飭曹克忠等軍回援省城林之望接此旨後即可一面稟商楊岳斌一面函催曹克忠等以期援兵速到保全根本重地林之望所陳省城飢困情形覽奏實深矜惻著照所請卽於陝省運秦糧內先劃撥一萬石設法運解赴省以濟危急楊岳斌不得堅執成見仍將運秦

糧石存儲靜甯致令省城兵民飢困難支兵勇同爲國家出力朝廷本無歧視羅宏裕何得捏造裁汰兵丁之言激成眾怨此等劣員貽誤邊隅大局實堪痛恨已諭令楊岳斌查明嚴行參辦林之望仍遵前旨剴切曉諭眾兵各守營規毋懷疑懼果能殺賊立功自當寬其既往予以自新也○諭林之望奏省城糧道久梗請撥陝運糧石並兵丁具稟申訴暨近省股匪環伺兵勇接仗情形各摺片已傳諭該藩司善爲撫輯固守待援矣省城兵丁滋事變起倉卒此事本由楊岳斌厚勇薄兵所部將士又從而陵侮之以致兵心不服積憤日深一發莫遏見在該標兵具稟向林之望申訴尙有悔罪畏法之心楊岳斌當設法撫定查明激變之楚將及爲首滋事之標兵持平辦理並曉諭脅從之眾毋懷疑懼以安其心尤須先將省外附近股匪剿平後再行察看情形相機查辦不可

鹵莽輕發並不可輕聽所部楚勇憤激之言不察起釁情由概行誅戮此次林之望所奏各摺片朝廷詳加披覽似屬實在情形未必皆係被脅捏飾之詞羅宏裕以朝廷欲裁撤兵丁之言捏造激變咎實難辭楊岳斌務將羅宏裕激變情由查明參辦不准稍涉徇徇省城以外附近地方跬步皆賊藉乞撫之名爲斷絕糧路之計鶴齡見率通判鄭聲文等將河北回匪先行開導權宜安輯並調回張玉春文象奎等三營回省以壯聲勢惟兵力仍形單薄該藩司請將雷正綰曹克忠所部調回省垣助剿著楊岳斌遵奉前旨迅速酌調曹克忠一軍赴援肇昌軍務該督另派得力之員前往督辦省城以外各股匪環伺該督亦當分派將弁疏通糧路以顧根本林之望所調之春奎等三營餉缺過久困憊幾不成軍省城糧路久梗兵民飢困難支至有割食人肉之事慘迫情形實堪

憫惻著楊岳斌劉蓉迅將陝省運秦糧內劃撥一萬石繞道運赴省城以救然眉之急毋稍歧視致誤事機劉蓉於陝省糧石仍當廣籌採買派委妥員源源接濟不准推諉稽延林之望原摺二片片二件呈一件並傳諭林之望諭旨一道均著鈔給楊岳斌閱看將此由六百里各諭令知之○丙申諭軍機大臣等吳棠奏捻股併竄亟籌防剿並據謀報逆匪繞竄情形各摺片張賴等逆併力南趨擾及豐蕭碭山等處距徐州府城僅五十里而任柱復分股竄至舊邳黃河底其後隊均在邳睢所轄之姚家集大王集等處清淮邳宿各防俱形緊要著吳棠嚴飭駐紮成子河等處官軍聯絡聲勢認真防剿力固清江門戶並檄飭姚廣武等嚴扼運河上下毋令一騎偷渡仍隨時咨商劉秉璋將宿遷一帶堵守事宜妥籌兼顧碭山見已被困賊氛充斥張逆等並有取道豐縣窺伺蒙

毫之說喬松年務須添撥勁旅迎頭截擊毋稍疏虞並著會國藩督飭劉銘傳周盛波等跟蹤追剿會合江北諸防軍兩路夾擊先將任逆一股殄除保全完善然後視賊所向相機調遣以期次第廓清吳棠另片奏江北地方鎮道是否仍暫行節制抑卽復舊制等語見在江北防務喫緊所有該處鎮道各官著仍歸吳棠暫行節制俟軍事大定再行奏明辦理將此由六百里各諭令知之○諭楊岳斌奏曹克忠進剿南路逆回連獲勝仗平毀賊壘並收復洮州廳城一摺曹克忠一軍自移紮馬營以來屢次獲捷洮州繳械獻城兵不血刃布置善後亦頗有條理所辦甚爲安速所有此次收撫洮州降回及華家嶺牛營溝等處剿賊獲勝並前次鴛鴦背等處勝仗在事出力文武員弁兵勇均准楊岳斌彙案擇尤保奏毋許冒濫昨諭楊岳斌將曹克忠軍調赴蘭州援剿鞏昌軍務

另行派員接辦卽著迅速調派蘭州標兵因飢生變省外各回耽
耽窺伺情形十分危殆而楊岳斌本日來報絕未提及實堪詫異
該督務當懷遵屢次寄諭趕緊進兵先剿省外各回再行進省設
法撫定持平辦理不得稍存成見以副委任另片奏糧臺事宜仍
令林壽圖專摺奏報等語林壽圖前辭專摺業經降旨允准以後
糧臺事宜仍由楊岳斌具奏如該督已回蘭州遇有糧臺急應入
奏之事卽就近由劉蓉奏報以期事權歸一將此由五百里各諭
令知之○以四川勸辦甘肅軍餉出力予已革布政使毛震壽開
復道員餘加銜升敘有差○丁酉諭軍機大臣等官文奏整頓鄂
軍並明字四營驟難抽調赴甘一摺張賴等逆見竄曹單豐沛一
帶距鄂境雖遠而賊蹤剽疾總須先事籌畫以備不虞官文會國
奎見擬整頓各營將楊朝林等軍分別遣畱騰出餉源由該撫另

選良將添募精壯俾成勁旅所籌尙是卽著該督撫和衷商辦將
新募各營認真訓練務使戰守有資毋得空言了事楊岳斌前調
之藍斯基四營想卽係藍斯明所部該督以鄂省兵單擬請仍留
防剿惟甘省賊勢蔓延又無得力將弁事機倍形喫緊朱南桂劉
連捷等前經楊岳斌奏調又爲會國荃調赴鄂省甘省更無可恃
之軍仍著官文會國荃於該數員內酌量分撥赴甘毋得稍分畛
域以顧大局鮑超一軍急盼北來何以尙在江西著該督撫趕緊
咨催赴豫不准任意逗畱並將該軍餉需妥爲解濟以利軍行將
此由五百里各諭令知之○戊戌以馬如龍署雲南提督○廣直
隸天津學額六名電籍一名江蘇太倉州學額五名鎮陽縣二名
○予四川陣亡遊擊譚見壽等祭葬世職○己亥 上詣 大高
殿祈雨○諭軍機大臣等富明阿奏遵旨體察吉林軍務情形酌

擬辦理一摺馬賊江洛道等由勒克山西鼠李半瘋等盤踞平甸子地方欲往西北竄擾亟應迅速剿捕以淨餘氛富明阿見擬飭烏里布統帶黑龍江征兵會同春壽所統吉林馬步隊前往攻剿調富爾琿來省自行出省督師所籌均尙周密卽著該將軍妥速籌辦務將各股賊匪搜捕淨盡以副委任被擾地方當飭常海等認真清查妥籌撫字毋令一夫失所阿勒楚喀副都統卽著以勝安署理雙城堡總管卽著以喜貴署理責令將一切善後事宜實力妥辦富明阿遵議從征殘廢兵丁請將年逾六旬者仍照定例月食半餉未及六旬告退後傷病痊愈者俱照兵丁一體應差仍食半餉征兵並未傷廢者不准告退冒餉於國家矜恤將士整飭戎行之意均不相背卽著照所請行富凌阿旣不得兵心著暫停獎勵仍飭令奮勉圖功以觀後效另片奏革員安榮見應起解赴

戊紳民保畱懇切奏明請旨等語安榮著准其暫停起解仍畱伯都訥城協同新任同知辦理防剿撫綏事宜如再不知奮勉卽著

曾國藩奏查臬司潘

鼎新由梁山拔赴靳口駐紮三月二十日行抵安山見賊騎充斥該軍整隊而進北至戴廟賊於二十一日向西南回竄屯聚鄆鉅之交劉銘傳周盛波兩軍已於二十一日同抵鉅野二十二日劉銘傳由鉅城西北出隊行十餘里遇牛洛紅前股經黑龍江馬隊猛進擊之生擒三十餘人賊遂奔潰周盛波由鉅之正北出隊亦行十餘里與逆黨相遇斬獲數十人該逆不敢戀戰遽向西南狂奔二十三日劉銘傳率眾跟追行過韓氏橋十餘里該逆將步賊藏於村樹林中以馬賊徑撲張景春之師尙未交鋒遽行返奔劉銘傳知其詐敗不令追逐該逆仍結隊南行劉銘傳亦率眾南趨

與賊並驅行抵烏官屯張總愚自率悍黨排紮不行見黑龍江馬隊卽攏擁來鈔保成等施放洋槍斃賊數名賊勢稍卻畢乃爾連開炸礮轟擊黃桂蘭劉明幹率隊殺入張景春吉爾洪額六十七等乘勢鈔追擒斬悍賊十餘名馬賊大潰步賊亦退退四五里仍拔隊南行其時銘軍已行五十餘里各營兵將仍願奮力一戰不肯休息遂率黃桂蘭畢乃爾等分三路鈔襲張逆亦分股迎撲左右兩軍牛逆迎撲中軍進抵龍坨集西畢乃爾李錫增各放炸礮牛逆不敢前進張逆馬賊先與我交鋒未分勝負步賊從後擁進丁汝昌滕學義等各放排槍斃賊滿地賊猶持矛猛進唐殿魁督軍一呼如牆而進殺賊五六百人餘皆奔逃馬賊見步賊潰敗齊來救應復經劉盛藻等擊敗劉銘傳見張逆馬步俱敗令黃桂蘭等率勇衝擊殲殺百餘人餘賊向西潰去我軍追奔十餘里天晚

收隊當查營官馮汝霖頭受矛傷并勇傷亡數十名周盛波一軍自鉅野接仗後訊據生擒賊供張牛等逆欲由歸德回竄蒙臺該軍老營畱於歸德僅帶八成行隊來東正在趕回防所二十五日探知逆股竄向城武拔隊疾馳至城西二三里許該逆大股遙擁而至我軍屹立不動槍礮環擊鏖戰逾時馬隊衝截而出營官周行發手刃逆首張大發一名賊眾立潰提督周盛傳各營亦至從後掩殺共斃賊匪二百餘名我軍亦微有傷亡二十六日周盛傳至荷澤之侯家集該逆正在分攻各寨其新破之游莊毫無準備周盛傳揮兵直進一擁而入殺賊百餘名就地紮營該逆糾黨回撲力戰卻之周盛波於二十七日黎明趕到會合一處該逆見我軍分布營壘乃搶踞前後大莊三處拌死來戰我軍施放洋槍炸礮一面趕築營牆頃刻而就該逆分股來撲騎賊前後包衝我軍

往返回合鏖戰極苦經周盛傳指揮連斃賊目十餘名賊隊始亂各營乘勢掩殺賊乃奔潰追逐五六里是役我軍僅二千餘人賊過十倍自辰至酉終能冒險制勝營官多受矛傷弁勇傷亡百餘人是夜二更後周盛波派隊於方埠賊巢外偪紮兩營二十八日大隊繼進張逆正出賊抗拒我軍用炸礮轟塌土牆攻克該圩擒眾向東南逃竄圩內搜殺又數百名劉銘傳一軍於二十七日向晚至曹縣探知近城有賊不辨何股卽選小隊於三更後潛至賊館分路掩襲殲殺數十名臣查此次捻黨全數東竄銳意搶渡運河經潘鼎新首挫兇鋒使不得壹意東渡該軍於上年六月由蘇州進衛畿輔盛暑航海物故者多自駐防濟甯疊以力戰保全東境應懇天恩准臣將潘鼎新一軍開單保獎以示鼓勵山東諸軍扼守運河屢次撲犯均經擊退併懇天恩准閩敬銘擇尤保

獎臣調齊各軍進逼本可合圍痛剿乃該逆遽折而南趨未加懲創正深焦灼幸劉銘傳龍壩集之捷般賊精銳頗多周盛波游莊寨之捷以少勝眾冒險立功所有銘軍出力之營總恩騎尉保成應請以防禦儘先補用並賞換花翎佐領吉爾洪額六十七均請以參領補用吉爾洪額並請賞換花翎其餘出力員弁仍歸黃陂案內彙獎涼州鎮總兵周盛波兄弟竭力苦戰膽智俱優應如何獎勵之處出自鴻施其所部盛軍出力員弁暫行存記俟續有戰功再爲請獎又奏接據各路稟報知捻股自三月二十三日與銘軍接仗後卽分股南趨張牛等逆被周盛波二十七日擊敗連日竄往歸德虞城旋又由豐縣折回單縣徘徊不去似有回竄曹濮之意劉銘傳一軍四月初三日由虞城馳抵單縣之黃岡集緊躡其後臣飭李昭慶一軍由金縣馳抵單縣與銘軍會同剿辦而

仍以潘鼎新之軍畱防濟甯長溝一帶備賊回竄劉松山一軍前
已調至濟甯因賊眾回竄又令趕回湖團周盛波一軍於上月二
十九日趕回歸德因賊分竄雒河又於初四日拔赴亳州至任柱
等一股先由永城颺蕭竄至雒甯境內之雙溝初二日馬賊已撲
近阜河洋河等處距宿遷不遠該縣見有劉秉璋一軍駐防與上
游窯灣等處吳榮源出之軍韓莊八廂楊鼎勳之軍聲勢尙爲聯
絡該學士將來卽移所部駐紮徐州居四鎮適中之地仍作一路
游擊之師臣本早擬查看黃運兩河因賊蹤盤旋不定遲遲未行
臣以東北則畿輔爲天下之根本東南則江蘇爲臣軍之根本屢
奏明注重東路旣以東路爲重不得不藉運河衣帶之水阻截流
寇惟河淺且窄汎長千有餘里防不勝防臣擬請同閫敬銘等大
加修浚增隄置柵能否確有把握俟
後續行具奏 上諭

張總愚賴汶沆等逆全股因黃運兩河防守嚴密不能搶渡折向南趨劉銘傳督軍擊之於龍垵集大獲勝仗周盛波一軍復由鉅野迎至荷澤續獲勝仗該逆屢遭挫敗已有分股散竄各路之勢昨據吳棠奏稱張賴等逆擾及豐蕭楊山等處任柱復分股竄至邳睢境內碭山見已被困張逆並有取道豐縣窺伺蒙亳之說當經諭令會國藩吳棠喬松年分別防剿茲據會國藩奏稱張牛等逆由豐縣折回單縣並聞有分竄雒河亳州之說任柱一股由永城碭蕭竄至睢甯距宿遷不遠與吳棠前奏情形大略相同該大臣務當督飭劉秉璋所部與吳棠派出各軍聯絡聲勢杜賊東竄力保完善一面知會喬松年督兵堵截與同防歸德之周盛波一軍互相援應以杜紛竄賊既有回竄曹濮之意運河防軍尤當嚴加整飭著會國藩閻敬銘妥籌布置不可稍形鬆懈東路之防既

以運河爲阻截捻蹤之界則修濬之工不宜稍緩著會國藩會同
閻敬銘等趕將河身淺窄處所大加挑濬務令一律寬深足以限
制賊馬並於河岸增隄置柵俾資扼守將此由五百里各諭令知
之○庚子諭內閣文祥等奏匪首伏誅餘黨遣散一摺奉天馬賊
自逆匪王起周榮被誅後馬傻子一犯尙敢率其黨與屢抗官軍
擾害奉天吉林熱河三省兇惡眾著實爲法所難容該逆因被官
軍擊敗追剿窮蹙赴花里雅春軍營乞降文祥等以該逆罪大惡
極與被脅反正悔罪輸誠者迥異因將該逆押赴軍前正法梟示
並將其死黨王振東齊海等一併正法足以昭炯戒而快人心其
餘黨三百餘名概予免罪業經分別資遣此外先後投誠各眾果
能真心向化痛改前非朝廷必當寬其既往咸與維新以示法外
施仁至意○諭前因劉蓉奏參楊能格於各營糧餉分撥不均營

私侵蝕各情諭令楊岳斌趙長齡查奏茲據奏稱糧臺收支有無浮冒全以支發底簿及歷任報銷冊爲憑楊能格以前辦糧臺之熙麟文煜兩任報銷冊籍均未移交該臬司本任糧臺收支各款業已奏准自行報銷所有底簿不肯交出慶防弁勇兵餉較之發給前敵及涇防各營多至數倍顯有捏私偏袒勻撥不公情事其支發慶防親兵馬隊餉項則照楚軍章程入營弁勇則照熙麟等舊章減扣發給於魏添應新招馬隊又照楚章支給實銀辦理均屬兩歧請旨先行交部嚴議等語楊能格自接辦糧臺後於支發糧餉意爲輕重以致物議沸騰實難辭咎著先行交部嚴加議處其經手糧臺收支款項著楊岳斌嚴飭趕緊造冊報部覈銷以杜弊竇而昭覈實尋吏部議上得旨楊能格著照部議降四級調用不准抵銷○諭軍機大臣等文祥等奏接奉寄諭覆陳奉省賊情

繪圖呈覽一摺牛莊收復後室廬俱尙無恙營口前經派兵駐紮
見在敗匪南竄鳳凰城之東復由安平河等處逃逸出邊至山內
潛匿而興京附近之新兵堡灣甸子等處探有賊匪四五百名經
富和等進勦逆蹤遠避該處峰巒互易於藪奸著飭令劉景芳
潘永春等分道搜捕毋任再行嘯聚滋事至西路單家五臺子等
處被擊餘匪或五六十人爲一股或三四十人爲一股此時畏懾
聲威不敢肆擾誠恐大兵一撤三五成羣復圖煽煽仍爲地方之
患文祥假期已滿福興管理神機營差務亦屬緊要該大臣等亟
應來京供職節次由京派出及直隸天津所調之旗綠各營除凱
撤外應酌留奉省若干以備防勦之處著與都興阿會商調派卽
著該將軍接辦奉省軍務並准其節制各軍以期事權歸一其餘
該大臣等經手未盡事宜一併移交該將軍會同兼尹府尹等妥

籌辦理園場內竄匪必須剿捕其安分良民不得概行誅戮著都與阿認真籌辦爲一勞永逸之計將此由五百里各諭令知之○

以郭柏蔭爲江蘇布政使

由蘇松常鎮泰道遷

並護巡撫劉秉璋爲江蘇按

察使

由翰林院侍講學士遷

○辛丑諭軍機大臣等訥爾濟奏偵探東西兩

路賊匪情形請飭成祿等出關進剿並請飭撥兵餉各摺木壘奇

台古城等處均已無賊訥爾濟派委佐領百喜等帶兵前往並招

募民勇防守地方該防禦等往濟木薩攻奪逆匪糧草如得大兵

出關回子郡王伯錫爾等均可協同攻剿成祿一軍見在何處著

楊岳斌迅檄該提督帶兵出關與伯錫爾等聯絡聲勢不得再有

畏葸遷延致干重咎鶴齡一軍前次疊經降旨令其會同成祿一

軍出關剿賊嗣因蘭州兵變調鶴齡駐省防剿見在省城情形能

否安靜如曹克忠軍到省能否替出鶴齡之軍仍令會合成祿出

闕並著楊岳斌妥籌調度巴里坤領餉委員張積功等在蘭州守候五年之久甘肅積欠巴里坤餉銀爲數甚鉅著楊岳斌於欠解巴城俸餉內迅速籌撥十數萬兩陸續派員撥解並傳知張積功等由北路草地解至烏里雅蘇台由訥爾濟派員迎提接濟以重兵食而固邊陲將此由六百里各諭令知之○壬寅諭軍機大臣等楊岳斌奏復陳省城兵變情形並陳上年整頓營務及見在籌辦緣由隆德縣城猝被回陷請調鮑超全軍赴甘各摺片甘省營伍積弊原應次第整理惟須體察事勢緩急相度辦理不可偏執重勇輕兵成見一味操切從事此時事變已成槍礮火藥俱爲叛兵搶奪城門又爲所據該督見率所部折向省垣進發自宜先將脅從各兵曉諭解散使其黨與離心方可次第查拏首犯按律懲辦若先揚言督兵勦洗必致該叛兵閉關拒守攻克需時見在省

外各路回匪均已逼近省城儻官軍頓兵堅城之下內爲叛兵所拒外爲回匪所乘進退失據恐大局益形窒礙該督見已由涇州起程並令曹克忠一軍先回省城著卽飭令迅速前進楊岳斌務須審度機宜謀定後動不可徒逞憤兵輕於一擲北山來賊較前倍加河伙大股圍撲省城並分股繞至車道嶺等處阻截官軍進援之路著楊岳斌分飭將領疏通道路將省外回匪擊退隆德縣城爲回匪襲陷楊岳斌當分兵迅圖克復該縣文武下落查明具奏鮑超所部兵勇見因捻匪滋擾亟須前往鄂豫助剿斷難調赴甘省朱南桂等前經會國荃調赴鄂省當論該督撫等酌量派員帶勇援甘尙未據該督撫覆奏因思甯夏此時已無軍務卽著穆圖善分撥得力將士前往靈固一帶勦辦騰出雷正綰譚玉龍等軍由楊岳斌相機調遣互相援應以厚兵力林之望前奏彭楚漢

等所部十營屢次挫敗該督所報彭楚漢等在連道嶺獲勝情形
是否確實並著查明具奏叛兵謀變既有三更後沿街呼人之事
羅宏裕何以未經立時集勇彈壓該叛兵蓄謀既非一日林之望
固未能豫籌解散羅宏裕豈竟漫無見聞並著楊岳斌確切查明
持平辦理將此由六百里各諭令知之○予甘肅陣亡副將張定
元參將會國福遊擊劉南瑞祭葬世職○癸卯諭軍機大臣等劉
坤一奏籌濟霆軍月餉並席寶田請假歸省一摺鮑超勦捻月餉
既經劉坤一議定截至本年三月底止無分馬步由江省仍發全
餉自四月初一日起月撥七萬兩專供步隊口糧卽著源源解濟
毋令缺乏前因勦捻緊急諭令官文等咨催鮑超趕緊北來見在
捻蹤竄擾靡定亟盼鮑超統軍北上爲大枝遊擊之師著劉坤一
傳諭該提督懷遵前旨剋日由豐城拔營馳赴豫省會合曾國藩

派出各軍遇賊卽擊以期迅殄賊氛毋再稽延致負委任席寶田
思親念切自應俯如所請著賞假六箇月回籍省親俟假期一滿
卽著赴黔任事屆時察看黔省軍情由該臬司選募勇丁以供驅
策李元度一軍餉項仍著劉坤一酌度情形妥籌解濟卽作爲協
濟黔省之項不得稍存歧視致誤戎機將此由五百里諭令知之
○諭瑞麟等奏籌辦各屬土匪情形請將倡亂之紳士斥革並代
李福泰謝恩請賞該藩司假期補行穿孝各摺片廣東翁源縣等
處土匪經瑞麟等督飭員弁兵勇疊次進剿攻破礮樓平毀各處
匪巢拏獲匪犯三百餘名及著名各首犯解省正法洵足申國法
而快人心其庇匪抗拒之武進士楊林芳候選訓導黃遇周尤屬
罪大惡極均著卽行褫革交瑞麟等訊取確供後卽行正法以昭
炯戒該省風俗獷悍所在築立堅牆廣開礮眼私造兵器專務以

強陵弱負險抗拒官兵此次經瑞麟等派兵勦辦該土匪仍敢開
礮拒捕毫無顧忌且有匪徒屯聚而紳士爲之主持者民風敝壞
至於斯極應設法搜勦盡絕根株著瑞麟等嚴飭在事員弁兵勇
將東北兩江各處土匪次第搜捕不准一名漏網各營傷亡哨弁
勇丁著查明分別請卹出力員弁著俟各路土匪辦竣再行彙案
請獎開復布政使李福泰前因丁日昌條陳辦理潮州中外交涉
事宜諭令瑞麟將該藩司暫留粵省酌量派往潮州曉諭紳民茲
據瑞麟等奏稱李福泰奉旨北上懇請賞假便道先回山東本籍
補行穿孝自應俯如所請惟潮州事關緊要未便遽令回籍李福
泰著俟辦理潮州交涉事件完竣再行賞假百日回籍穿孝將此
由四百里諭令知之○諭崇實駱秉章奏請留雲南巡撫督軍暫
紮遵義會勦黔匪一摺所稱勞崇光見已進省滇事似宜緩圖而

黔寇亟應剿辦兆琛督帶楚軍由貴東長驅大進劉嶽昭卽督各營掃蕩貴西賊匪兩面夾擊黔事既定則聲威遠播滇事亦易措手請飭劉嶽昭仍紮遵綏俟貴州軍務漸鬆再赴雲南等語固屬兵貴先聲當務爲急惟勞崇光已入雲南省城非劉嶽昭督軍繼進不足以壯聲援而資震懾前經諭令劉嶽昭疏通道路馳赴黔省仍著該撫遵奉前旨督飭各軍節節進剿將黔西大定畢節一帶土匪殲除卽帶果後各營相機赴任毋稍遲延劉嶽昭赴滇後卽著崇實駱秉章另派知兵大員統帶成耀星潘長青何行保等軍約會楚軍剿辦黔匪仍飭邊防各軍嚴備兜剿如此辦法黔事既有起色滇事亦不至置爲緩圖似較周密勘定滇黔卽所以保衛川疆想崇實駱秉章必能通籌全局不至顧此失彼也兆琛規畫貴東一切軍情會諭令自行奏報以免遲滯見在進兵機宜尙

未據該藩司馳奏著卽統率各軍相機前進迅將貴東肅清分路
進剿期與川黔各軍會合夾擊以收廓清之效綏陽業經收復惟
收降人眾過多必須妥籌安插方免後患仍著劉嶽昭慎重籌辦
毋稍大意將此由六百里諭知崇實駱秉章劉嶽昭並傳諭兆琛
知之○予貴州陣亡參將彭萬俊等祭葬世職○甲辰廣浙江浦
江縣學額三名瑞安文四名武二名○乙巳諭軍機大臣等穆圖
善奏宿靈次第安定探聞省城危困靖遠失守一摺靖遠縣城於
三月十四日失守尙未據楊岳斌奏報著卽將被陷情形及該城
文武下落查明具奏一切抽撥勁旅將隆德靖遠兩城迅圖克復
見在該將軍檄調曹克忠馳赴靖遠剿除踞匪惟該提督一軍前
有旨諭令馳援省城自當先其所急著穆圖善楊岳斌速飭該提
督趕緊長省毋令展轉貽誤昨因蘭州軍情危急諭令穆圖善分

撥得力將士前往靈固一帶剿辦騰出雷正綰譚玉龍等軍由楊岳斌調遣茲據該將軍奏俟甯靈事局大定偵探何路喫緊卽行移師前進會合殲除與前旨脗合卽著迅速調派毋誤事機竄陷靖遠之匪是否係回逆馬生彥楊文智等抑係河狄回匪乘間竊發孫義寶投誠後雷正綰派令孫義漳接統其眾見在雷恆正法該回眾麤集固原會甯韋州半箇城一帶是否尙屬安靖抑或竄赴靖遠著穆圖善楊岳斌確切探明星速馳奏將此由六百里各諭令知之○丙午諭軍機大臣等李瀚章奏剿辦銅仁教匪大獲勝仗見擬合力進剿一摺貴州銅仁教匪經總兵周洪印督軍進剿卽向沙壩場竄去另股竄入松桃屬境窺伺楚邊經周洪印於亢金盤陀等處豫設伏兵誘賊深入殲斃賊匪數千該匪向思南印江奔竄銅境肅清而清台各匪又復蠢動亟應分投剿洗此時

兆琛李元度等軍計已分紮鎮遠銅仁卽著李瀚章嚴飭周洪印
整頓隊伍由天柱進兵與該兩軍聯絡聲勢攻剿清江台拱苗匪
盡掃賊氛肅清邊境其逃竄思南印江三元閣聖寨各匪並著兆
琛督率兵弁設法搜捕毋任漏網李瀚章另片奏請賞還李元度
原銜頂帶等語著俟該革員立功後再行奏請將此由五百里諭
知李瀚章並傳諭兆琛知之○予陝西殉難知縣姚文翰祭葬世
職○丁未 上詣 大高殿祈雨○諭軍機大臣等吳棠奏逆股
先後東竄淮徐布置防剿情形一摺任柱股匪由東省闌入徐郡
分屯邳州宿遷睢甯境內擄脅丁壯攻掠圩寨游騎直抵桃源經
吳棠調撥水陸兵勇分防布置並飭姚廣武督軍馳赴舊邳將撲
圩悍賊擊退該逆全股由泗州竄去其張總愚賴汶沆各股由單
縣南竄豐碭境內並由沛縣張家寨攻撲湖團經劉松山一軍擊

退見仍屯踞豐碭之交此次捻股先後悉銳東趨意在搶渡運河蔓延清淮腹地雖經吳棠添募兵勇分撥成子河及舊邳洋河集等處扼紮惟賊勢太眾深恐兵單地廣防不勝防該漕督務宜督飭所部將士力扼河防以固清淮門戶並著會國藩趕緊催令劉銘傳等軍星夜前進跟蹤緊蹙會同吳棠派出防軍奮力夾擊毋任該匪擾及完善地方總兵劉士奇所部七營見在東壩定埠等處分紮卽著李鴻章迅速飭令拔營渡江馳赴清淮聽吳棠調遣江南見尙安謐此外如有可調之兵並著李鴻章趕緊調援江北以厚兵力任逆一股見已分擾泗州皖境盱眙靈宿一帶均須戒嚴喬松年當撥兵嚴扼東北選派得力將士越境迎剿不可稍分畛域歸德一帶與徐境毗連更虞滋蔓著李鶴年派撥重兵相機堵剿毋任賊蹤西竄致豫省腹地又被蹂躪見在捻匪均聚江皖

之交會國藩務當統籌全局調撥各路兵將四面兜圍使該逆不出吾網羅之外勦辦當易於措手也將此由六百里諭令知之○戊申諭內閣前因馬賊闖入吉林伯都訥雙城堡署將軍德英署副都統富爾琿未能先事豫防將該署將軍等交部議處復因阿勒楚喀拉林等處相繼失陷又將該署將軍等交部嚴加議處疊經兵部議奏請將該員等照例革職並請飭部照章議罪等語德英富爾琿於所屬地方任令賊蹤竄擾本有應得之咎惟念伯都訥等處業經官軍收復德英防守吉林省城籌餉籌兵尙無貽誤富爾琿督兵勦賊屢獲勝仗不無微勞足錄德英富爾琿均著加恩改爲革職畱任免其治罪○諭軍機大臣等富明阿奏勦賊獲勝並擬出省督師一摺李半瘋股匪竄過江東一帶經富爾琿等會擊於關家大稿斃賊甚夥該逆出楚家溝分兩股竄逸其竄西

南一股經官兵殲斃淨盡其一股二百餘名竄上黑瞎子岡復經
擊斃一百餘名餘匪撲過湖北著富明阿卽飭營總烏里布跟蹤
追剿務將敗殘之匪迅速殲除毋令死灰復熾此時北路漸次肅
清西路賊氛未靖富爾琿業已回任富明阿擬卽出省督師清理
圍場實爲見在要著惟該處毗連奉省此剿彼竄賊之慣技非兩
省合力夾擊勢難淨絕根株著文祥福興都興阿酌撥馬步勁兵
與吉省之軍定期入山會剿將山內山外賊匪實力搜捕爲一勞
永逸之計文祥福興已將回京都興阿接辦奉省軍務責無旁貸
著將會剿事宜妥籌調度毋得稍分畛域致貽後患將此由五百
里各諭令知之○吏部議覆熱河都統麒慶奏請變通熱河州縣
調補舊例擬請嗣後灤平豐甯二縣定爲一調一補輪應調缺出
由該都統會同直隸總督於見任理事撫民各同知通判及滿漢

州縣一體揀調輪應補缺出卽以熱河揀發州縣按名酌補其平
泉建昌赤峰朝陽四州縣缺出先於灤平豐甯二縣內揀調如但
不堪調再於見任撫民同知通判內曾經署理州縣及滿漢州縣
內請調如再無可調之員則委揀發州縣試署一年果能勝任准
請實授從之○己酉諭軍機大臣等文祥等奏分別撤畱兵勇並
起程回京日期一摺文祥等督勦奉省馬賊數月以來殲除逆匪
幾盡西北兩路地方均已安謐惟東北尙有股匪三百餘名竄出
鳳凰門外該大臣等見飭劉景芳等勦辦此外並無成股之匪第
恐大兵一撤圍場內藏匿餘匪復經竄出勾結伏莽爲患地方又
將色爾固善等所統馬步兵勇三千四百餘名畱於奉省交都興
阿調遣所籌均屬周妥都興阿身任將軍責無旁貸著將餘匪認
眞搜捕以期淨絕根株文祥等所畱之雙德等均交都興阿差委

俟搜捕餘匪一律完竣再將文祥等所畱兵弁分起撤令歸伍另片奏博崇武所帶二起馬隊營總委參領玉山委防禦如福由吉林拔隊回奉之時揚言調赴湖北剿賊該兵等思戀鄉土紛紛逃散玉山等乘勢搶去旗纛等件計逃散官弁十二員名兵丁一百三十八名旋在吉林呈遞匿名揭帖捏稱久不發餉各思回家請飭訪拏分別懲辦等語玉山等布散謠言惑亂軍心以致紛紛逃散實屬大干軍律著富明阿嚴密訪拏將玉山如福二員押解奉省交都興阿訊明後卽行正法其餘潛逃之官弁十員兵丁一百三十八名催令迅速歸隊量予責罰以肅營規將此由五百里各諭令知之○以劉崐爲內閣學士

由太僕寺卿遷

○庚戌諭內閣理藩院

奏烏凌阿蒙恩賞還公爵請旨遵行一摺烏凌阿新授之公爵著作爲恩封其德木齊扎布見襲之貝勒著仍作爲色楞所立之爵

○予山東殉難舉人姜毓杰等建祠○辛亥諭軍機大臣等前據吳棠奏稱擒匪竄擾淮徐當經諭令李鴻章將總兵劉士奇駐紮東壩等處各營馳赴清江援剿茲據李鴻章奏擒眾南竄見籌會剿情形一摺與吳棠所奏大略相同清淮爲裏下河各州縣屏蔽劉秉璋等軍見分紮宿遷及臺莊韓莊等處會同歐陽利見等水師力扼運河而清江防兵尙嫌單薄李鴻章見已調派劉士奇所部七營由東壩北渡卽著飭令迅赴清江聽候吳棠調遣此外江南如有可調之兵著仍遵前旨迅籌調赴淮徐以厚兵力劉銘傳由曹縣進解豐縣城圍見已進紮虞城李鴻章當飭令劉秉璋等軍由東南進剿與劉銘傳等會合夾擊以收聚殲之效並隨時與曾國藩吳棠妥籌調度相機布置以副委任本日據楊岳斌奏領餉委員曾廣照在江蘇辦買銅帽並洋火藥等件派于召喜解送

湖北轉解甘肅軍營由上海雇船裝運起程行抵棉花隄因火藥
轟發將銅帽火藥焚燒淨盡業經降旨將會廣照革職矣該革員
領辦火藥等項需費甚鉅所稟火藥轟發各節有無別情船戶會
廣長不戒於火會據李鴻章奏報即著該署督提集會廣照等嚴
切訊究從重懲辦原片著鈔給閱看將此由五百里諭令知之○
諭李鶴年奏髮捻回竄睢考一帶官軍進擊獲勝並出省督剿日
期一摺髮捻各逆由江南碭山一帶紛竄睢州考城等處經總兵
宋慶等督軍進剿擒獲賊首張泉城等十餘名賊始敗退官軍復
乘夜襲賊奪回踞莊五處斃賊三百餘名生擒捻首劉勤學等及
長髮老賊五十餘名剿辦尙屬得手出力員弁著准由李鶴年擇
尤存記彙案請獎髮捻各股忽分忽合剽疾異常而張總愚尤爲
狡悍必應就地勒洗俾免蔓延李鶴年見已出省取道陳畱杞縣

親赴前敵督勦卽著激勵將士乘勝進兵會合劉銘傳等軍前截
後追務將積年逋寇迅速殲除以副委任將此由五百里諭令知
之○諭楊岳斌奏譚玉龍難勝統領之任請以曹克忠接統所部
等語譚玉龍自當統領後性情疲玩不治眾情以致隴州四營相
率譁潰焚毀帳房遺失器械以此驕縱債事豈堪再令統帶貽誤
戎行曹克忠威望素著譚玉龍所部各軍著卽交曹克忠統帶以
期得力譚玉龍才略平庸若再不知奮勉卽著楊岳斌據實參辦
毋稍瞻徇正中營本係革弁劉正高管帶此次拔往隴州乃交與
羅得勝代管而自居住西安難保非知情先避羅得勝劉正高均
著交劉蓉就近嚴切訊究如有主使情弊卽著按照軍法從事毋
稍輕縱將此由五百里各諭令知之○吉林將軍富明阿奏遵查
巡檢董慈蔭剿賊奪獲大礮等件業經查驗並非安放 陵寢之

件該員率行稟報本應參處惟前因擊賊獲勝功過相抵請免置議前署將軍德英未能確查實屬疏忽請旨遵行得旨董慈蔭著免其議處德英著傳旨申飭此項礮件卽著畱於吉林毋庸解赴奉省○以英奎爲甘肅按察使

由蘭州道遷

○以甘肅隴州兵潰革副

將羅得勝余炳忠職○壬子諭軍機大臣等劉蓉奏甘省大股回匪併力回竄請飭督臣先清東路並請飭穆圖善撥營駐紮靈州等處各摺件河狄固原會甯諸逆相率蠢動隆德靖遠旣已先後失陷莊浪華亭並形危急見復擾及慶陽府屬之西峰鎮焦村等處將入陝疆逆酋孫義漳等將前所收降之馬德馨及總兵劉玉昌等數人戕斃復偪脅靜甯蕭河城等堡降回隨同起事爲今之計當專用力於東北杜平固出竄之路通慶涇饋運之途後顧無虞方可節節前進卽著楊岳斌派撥兵勇先將華亭甯州等處力

圖保護以次克復隆德靖遠翦除強寇引軍而西向平固靜會以規皋蘭林之望呼援甚切曾諭令楊岳斌調派曹克忠督兵赴援軍情變幻無常該督老於行陣惟當通籌大局穩慎進取方爲不負委任劉蓉見擬赴涇州一行該督撫將進止機宜妥爲商酌務出萬全陝西汧隴等處逼近回氛並著該撫督飭在事將弁實力防剿毋稍疏忽穆圖善前奏馬化澂投誠呈繳軍械馬匹各情是否尙有隱匿該將軍派員查勘必須覈實辦理毋任再有構煽穆圖善擬俟甯靈一律肅清察看賊勢何路喫重移師遄征著卽懷遵前旨派撥馬步各營駐紮靈州鹽茶交界之地與楊岳斌東路各軍遙爲聲援旣以絕陝回馬生彥等勾結之路亦以堅甘回馬化澂等歸順之誠據劉蓉奏甘回素多愚懦此次構難實爲陝回所迫陝回狡悍性成屢撫屢叛此時甘回可撫陝回尙不可撫等

語並著穆圖善詳察情形分別辦理毋得一味姑息致貽後患將此由六百里各諭令知之○諭景紋奏布魯克巴與披楞構釁親歷隘口相機籌辦一摺布魯克巴前經殺傷披楞數千人已成不解之仇見在披楞大股出巢號稱數十萬三月中旬可齊抵隘口意在報復前仇布魯克巴雖一時獲勝究難與披楞相敵若令唐古特從中說合既恐布魯克巴逞其無厭之求如聽其自然於唐古特關係甚大自應計出萬全以弭釁端該大臣見擬親歷隘口查辦一面藉校閱春操爲名暗中挑備精壯聽候調遣布置尙屬妥協均著照所擬辦理景紋抵布魯克巴後務當不動聲色將各隘口密爲防範仍相機籌辦俾兩造消釋舊怨歛兵回巢永息爭端方爲妥善將此由五百里諭令知之○癸丑 大考翰林詹事等官擢孫毓汶四員一等餘升黜畱任有差○甲寅諭內閣張凱

嵩奏剿平武緣逆匪殲擒首要各犯一摺廣西武緣縣悍民句匪倡亂節經道員易元泰等督軍進剿將上林所屬各村賊匪次第掃除並攻破潘村賊巢進軍武緣十二月二十八日官軍行抵韋朗村衝入賊柵適後路伏兵亦到腹背夾擊生擒韋見瓏等悍黨三百七十五名正月初八初十等日渡河進攻鄧廣賊巢歐見祥砍柵先進大隊繼之斃匪甚多立拔賊巢並將陸松夏黃兩村攻破生擒賊首陸行凌等多名被脅各村同時反正其退踞林貢之匪經官軍於三月十四十六等日進剿攻奪礮臺三座直逼賊巢生擒賊首韋逆等並逆黨五百餘名林貢遂平倡亂首逆韋治鞍自雙橋逃出竄伏隆安縣屬亦經團總周瑞平帶團往捕立時格殺全股殲除地方一律綏靖剿辦尙爲得力所有逃散餘匪仍著張凱嵩飭令易元泰督同地方文武實力搜捕毋任一名漏網此

次剿匪出力之員弁紳勇著准其覈實保奏毋許冒濫節次傷亡
弁勇著該撫查明咨部議卹○諭軍機大臣等張凱嵩奏官軍合
圍山澤壘平賊壘見在環攻老巢並永福南丹等處堵剿情形及
請催廣東湖南兩省協餉各摺片楚粵各軍合圍山澤攻堅奪隘
節節圖功見又戡定十二村削平三十餘壘孫逆勢成孤立自應
乘勝進剿攻克堅巢盡殲醜類著張凱嵩督飭劉培一等軍迅速
進掃埽穴擒渠尤當開掘長濠嚴防竄逸以臻周密張凱嵩見擬
裁勇裕餉而粵西地瘠民貧釐薄餉絀無從籌此鉅款若非鄰省
力籌接濟必致因欠餉無著滋生事端著瑞麟郭嵩燾李瀚章於
廣東湖南兩省原撥未解協餉項下各籌銀五萬兩剋日解粵俾
張凱嵩藉此欸項湊發散勇安慰飢軍將來山澤蕝事勇已酌裁
餉需自易籌畫廣東湖南兩省協餉儘此一批嗣後即可停止瑞

麟等務當竭力設措以濟鄰封毋得稍分畛域託詞推諉蔣益澧到任在即著卽會同瑞麟籌款協濟毋稍膜視永福修仁等處土匪滋擾雖經兵團擊退而餘匪未清修仁匪首黃侍涓等亦負嵎未下張凱嵩當檄在事文武剋期殄滅毋任蔓延貴州荔波苗匪分股擾至南丹邊界著張凱嵩嚴飭慶遠府屬員并厚集練勇扼要堵防相機迎擊毋令擾及邊界潯梧等處餘匪仍當飭令在事各員認真搜剔務絕根株將此由五百里各諭令知之○予廣西陣亡遊擊吳龍開等祭葬世職○丙辰曾國藩奏張總愚牛洛紅一股經劉銘傳周盛波擊敗後盤旋於虞碭豐單四縣之間劉銘傳一軍由虞城馳抵單縣之黃岡集緊躡其後疊有斬擒賊向東南奔竄四月初七日撲近湖團劉松山出隊迎勦旋又折回單縣十一日竄至城武十二日圍攻曹縣十三日竄至冉堦集十五日

復圍曹城適李昭慶劉松山由豐縣同時趕至會擊立解城圍十六日李昭慶等督軍前進離營數里賊卽分路來撲李昭慶飭令各營屹立不動洋槍礮連環轟擊賊隊已亂我軍馬隊始從樹林內突出橫衝右路之賊全行敗走其撲犯左路之賊劉松山派總兵李榮貴等各營分三路進擊自率親兵督戰槍礮齊發賊馬傷斃頗多該逆復從兩旁包鈔而以步隊大股合力猛撲各營穩持如故奮勇鏖戰槍矛並施賊勢不支紛紛敗潰另股之繞過南路者亦經我軍擊退計槍斃殺斃者幾及千名幸獲大勝張牛等逆遂由曹南奔潰是日劉銘傳一軍適由碭山而來復遇於王閭集我軍馬隊先與馬賊交鋒生擒十餘名步賊旋趨擁而至各軍槍礮齊發賊猶冒煙猛進經周忠本張士元等持矛惡鬪將接仗悍賊數百名殲斃殆盡賊勢大奔銘營乘勝追殺陣斬者約四百餘

名槍礮擊斃者尤多該逆悉數向曹縣東南竄走十八日各軍拔隊跟追二十日賊已竄至豐縣旋竄銅沛擾及曹徐之交至竄近宿遷清江一股是爲賴汝洸任柱李允等酋該逆於四月初七八等日攻撲運河不得逞志遂折竄泗州靈璧臣檄飭王永勝一軍剋日渡淮就剿靈泗一帶又調劉士奇七營渡江移紮宿遷騰出劉秉璋與楊鼎勳兩軍除酌留數營扼防韓莊八牖外其餘概作遊擊之師專辦靈泗睢宿及蘇皖交界各州縣三軍尙未拔營頃聞泗州之賊業已南竄周盛波移營亳州後重修濠牆聞該逆盤踞泗靈十八日率隊由宿州進剿其臨淮一鎮有編修張錫嶸陸營會同水師防守臣查此次捻黨由山東回竄分爲南北兩大股久踞曹徐淮泗徘徊不去一則各屬二麥旣熟乘勢搶割以圖一飽一則牽掣我軍冀乘不備襲渡運河竄入江蘇完善之區計臣

軍之勦辦北路者則有劉銘傳李昭慶劉松山等三支勦辦南路者則有周盛波一支而劉秉璋王永勝亦已改爲游兵惟劉銘傳一軍自去年臘月以來援鄂援皖援豫援齊將士疲勞已極頃據該提督呈請休息一二月借資整頓臣已批准飭令該軍移赴濟甯駐紮騰出潘鼎新一軍代爲游擊之師庶軍士不致過勞亦可保其常新之氣於勦辦似有裨益又奏臣於四月初七日會同撫臣閻敬銘由濟甯啟行沿河查閱自微山湖以北至長溝有潘鼎新一軍駐守長溝以北至開河一段向恃有南旺湖水故未設防茲查湖水全涸已由閻敬銘添撥防兵開河以北至靳口一帶水勢稍淺牆壘較低自靳口至安山木廟水勢甚深差爲可恃自木廟至沈家口十八里夏秋黃河灌運水極深廣冬春沙淤河乾殊難守禦見經閻敬銘籌議條款剋期興工無論河深河淺均增高

牆深濠以輔之其沙地及民圩不能掘濠者酌立木柵以輔之運河閱畢之後初十一等日與直隸督臣劉長佑會晤三人同閱黃河十三日還至安山由陸路至東平泰安查看形勢十九日仍回濟甯防所濟甯以下微山湖長一百八十里無須設防自湖以南運河深淺不等議定八牘暨宿遷等處由學士劉秉璋派兵防守窯灣暨成子河等處漕臣吳棠派兵防守總期力扼此河不使該逆流竄上諭軍機大臣等御史丁浩奏捻匪竄擾靡定河南山東兩省團寨林立惟與地方官未能聯絡一氣賊至驚惶失措往往爲賊所破團寨堵禦捻匪則不足協助官兵則有餘誠能動以忠義歆以獎敘必皆歡呼踊躍敵愾同仇請飭河南等省分派幹員糾合團寨以助兵力等語團練原以輔兵力之不足各該地方官果能認真督辦賊未至則堅壁清野賊已至則出奇制勝與

官兵相輔而行互相援救俾該匪不能任意奔竄自不難次第殲除著曾國藩閻敬銘李鶴年將該御史所奏各節酌定機宜遴選明幹有爲之員派往各府縣會同各該地方官糾合各處團寨與官兵聯絡聲勢協力兜剿以期早殄捻氛原摺著鈔給閱看正在寄諭閒據曾國藩奏捻逆兩股竄擾曹宿淮泗各軍分路剿辦卽著該大臣飭令潘鼎新視賊所向帶隊追擊毋稍鬆勁另片奏查勘運河情形等語運河逼近賊氛時思偷渡該大臣見已查閱形勢分段設防量加修濬實爲目前要務著隨時咨商劉長佑吳棠認真辦理以期周密閻敬銘尤當督飭防兵加意扼守不得以賊蹤漸遠稍涉疏懈將此由五百里各諭令知之○諭勞崇光奏抵省日期辦理情形一摺勞崇光由平犇起程於二月十五日抵省馬如龍率各回弁橐鞬道左整隊郊迎漢回民人夾道歡呼人心

大定該督於馬如龍等進謁時示以體統待以眞誠無不恭順悚
惕罔敢桀驁月來城內回練土練搶劫之事及省外各處漢回互
鬪之案皆已斂戢可見該處官民非不知尊奉朝廷止以數年來
督撫視爲畏途幾同化外此次該督輕騎前往駕馭得宜膽識俱
優實能不負委任杜逆汶秀盤踞大理聞該督入省於各隘口糾
黨抗拒卽著該督妥籌進剿謀定後動以期一鼓殲除該督於回
弁中分別推誠委任其居心叵測者密商馬如龍設法箝制並飭
張文德全祖凱等將所部嚴明紀律秋毫無犯俾滇省兵練知所
效法實爲切中肯綮從此官弁軍民消去漢回之見兩釋猜疑自
必人人思奮使貪使詐惟在該督斟酌而遣策之至滇省壞法亂
紀事同初刼應辦各件芟如亂絲補救之方自難急求速效又在
該督從容整理次第舉行以期漸復舊制固不必操之過急也另

片奏麗江鶴慶劍川前經楊玉科攻克見復爲大理逆回竭力環攻寡不敵眾仍復失陷該處深入敵境距省一千餘里勢難孤守著勞崇光飭永北大姚等處扼要嚴防與大兵訂期合剿以爲牽制賊勢之計其楊玉科下落並著查明具奏將此由五百里諭令知之○諭麟興奏蒙兵不能湊集請由內地派撥勁旅並擬來京請訓請另簡員與俄國立界各摺片據稱各愛曼蒙兵屢經催調無如該盟長等總以近來西疆不靖差務倍增蒙古窮迫萬難籌調爲詞卽勉強湊集亦爲數無幾且臨陣操兵緩不濟急等語伊犁軍情危殆萬分待援甚急內地之兵固應迅卽出關而烏城距伊犁較近尤宜簡練各軍以資協助等語麟興懷遵前旨將調到蒙兵逐加訓練卽由該大臣統率前往伊犁毋再遲延干咎麟興奉命赴援正應趕緊起程以副委任乃轉欲來京請訓實屬不知

緩急有意取巧麟興所請來京陛見之處著不准行仍傳旨嚴行申飭前諭令楊岳斌於曹克忠軍到省後替出鶴齡之軍會合成祿出關援剿卽著楊岳斌嚴催成祿帶兵出關儻該提督再有畏葸遷延卽行嚴參懲辦至鶴齡一軍能否替出並著妥籌調派俄國使臣會立烏里雅蘇台邊界事宜著俟該使臣有前來會勘信息再由麟興等迅速奏聞明誼等奏都司勝通患病可否回旗就醫等語見在巴里坤差委需員著卽飭令勝通就近調理所請回旗就醫之處著毋庸議將此由五百里各諭令知之○予浙江殉難道員進福雲南殉難同知徐自森等祭葬世職○丁巳 上詣大高殿祈雨○諭軍機大臣等楊岳斌奏抵涇先後籌辦情形一摺楊岳斌行抵涇州因莊浪被圍隆德失守炭山股匪已竄甯州東路事急未便抽身西去著卽懷遵前旨速飭曹克忠帶隊回

援將近省回氛次第埽蕩再進蘭垣楊岳斌見在督率諸軍勦清
東路而省城糧食萬分缺乏該督務當嚴飭張瑞珍等趕辦糧石
分運曹克忠軍營兼顧省城毋稍貽誤曹克忠業已啟行該督應
否另赴鞏昌督辦軍務兼籌糧運之處並著酌度機宜妥籌辦理
劉荅前奏甘回可撫陝回不可撫此次陝回孫義漳等由固來涇
遞稟乞降求歸原籍業經楊岳斌批准如該回等果係真心求撫
自應網開一面但人數尙多既不便復令回陝別滋事端而浮住
甘境亦非久長之計劉荅計已到涇卽著該督撫悉心籌畫安商
安置該回之策毋令失所毋貽後患方爲不負委任將此由五百
里各諭令知之○戊午諭內閣吏部奏原任都察院左副都御史
張芾之子張師勛應否賞還廕生聲明請旨一摺據稱舉人張師
勛由伊父張芾侍郎任內得有二品廕生嗣因張芾革職照例革

廕張芾起用後旋於同治元年五月在藉殉難奉旨照侍郎例從優賜卹與承廕品秩相當惟係照侍郎例賜卹究與生前開復者有閒應否還廕之處請旨遵行等語張芾前在陝西原藉勸諭回匪在倉頭鎮地方被害甚慘業經降旨照侍郎例賜卹該故員殞於王事忠烈可風伊子張師劬原得二品廕生著加恩准其賞還用示篤念忠盡至意○諭軍機大臣等富明阿奏官軍續獲勝仗生擒賊目並分兵堵擊入山搜剿一摺吉林官軍跟蹤追賊於三道夾信子葦子溝槐樹溝等處屢獲勝仗斃賊多名並能搜擒匪首李半瘋等尙屬奮勉出力富明阿見擬督帶官兵入山搜捕務當詳慎妥辦將賊匪巢穴掃除淨盡仍咨會都興阿合兵會剿以期一勞永逸全境肅清將此由五百里諭令知之○諭劉蓉奏逆回大股分竄陝疆見籌剿辦並陳拆閱林之望章奏所述情形擬

籌辦法各摺片林之望奏擊退省外賊匪固守待援請飭曹克忠等軍剿辦省賊楊岳斌所部楚軍併圖涇原並陝回投誠各摺片本日已傳諭林之望妥籌防守矣陝省逆回盤踞甘省日久見復句結各路大股撲犯陝境隴州汧陽兩城均經防兵擊退見由小路竄至鳳翔境內邊馬已至歧山該逆自三月以來徘徊於華亭崇信靈臺莊浪之間窺伺陝疆已非一日非厚集兵力不足以逞狂氛劉蓉見飭各路防兵分投堵截並調潼關駐紮各營馳往鳳郡一面咨令楊岳斌派撥馬步諸軍截前躡後卽著楊岳斌劉蓉合力會剿盡殲醜類毋令擾及陝疆林之望摺內所陳擊退偏城逆回各情據劉蓉奏稱陝中並無所聞西安距蘭州較遠該藩司所奏情形是否確實著楊岳斌就近探明具奏該督所部楚勇爲蘭州兵回所共忌而於百姓則素無積怨林之望所請將楚軍各

營合數調往涇原而以省城左右防勦責成曹克忠等辦理顯係被叛兵所脅飾詞入奏並非該藩司本意惟陝回近已悉萃隴東據劉蓉奏以曹克忠分軍移護省城而撥楚軍併力東勦以通糧道尙協此時權宜等語卽著楊岳斌統籌全局酌度情形妥爲調派省城糧米告罄勢頗岌岌並著楊岳斌飛飭曹克忠購辦麥麴雜糧隨時接濟毋稍遲誤馬士彥由陝入甘屢撫屢叛此次復向林之望投誠該藩司給予頂帶等件以紓省垣之急惟請歸併甯夏一帶與馬化隆一律辦理難保不與該處回匪勾結復生枝節著穆圖善楊岳斌妥商另擇甘省同居舊地暫爲安插以示羈縻林之望原摺二件片一件均著鈔給楊岳斌閱看劉蓉摺奏陝省火藥局被焚一摺本日已諭令湖北河南山西各督撫迅速如數撥解矣火藥被轟至十餘萬斤之多該管局人員漫無防範非尋

常疏忽可比著劉蓉迅即查明嚴參懲辦將此由六百里各諭令知之○諭傳諭甘肅布政使林之望林之望奏擊退偏城逆回固守待援並陝回傾心投誠懇恩准予安撫各摺片甘肅省城糧食久缺狄河回匪數萬環偏省垣焚搶滋擾經鶴齡等督軍奮擊張玉春文象奎等軍分路兜剿疊獲勝仗賊眾敗退剿辦甚屬出力即著林之望激勵兵勇扼要嚴防遇賊即擊毋得稍有疏虞省城糧米罄盡飢困情形實深廑繫前已疊諭楊岳斌等迅速設法解濟並令其檄調曹克忠一軍赴省救援見聞曹克忠已購辦麥麴雜糧隨時解送蘭垣而林之望摺內則稱僅接曹克忠三次函復而於運糧一節並未聲明究竟有無接濟見在如何籌辦並著林之望隨時具奏陝回馬士彥等既據林之望奏稱傾心投誠並將所捐糧石陸續運省是其悔過自新尙屬出於至誠自應寬其既

往另予安置本日已諭令穆圖善楊岳斌擇地安插林之望當靜候該將軍等籌商妥協札飭遵行馬士彥等見經林之望飭赴東北一帶助剿如能將省城糧食源源解運尤足徵向化之誠林之望當激勵馬士彥等勉圖報效力贖前愆至偪城回匪詭言投誠其居心殊不可測林之望惟當就見有兵力認真堵剿不得稍涉大意致墮詭計楊岳斌見在涇州辦理甘省東路軍務所部楚勇自應調赴東路以厚兵力已諭該督迅速調派其曹克忠一軍距蘭較近業經疊次諭令進援林之望俟該提督到省即可將防剿事宜與之妥籌辦理密片一件著畱中將此由六百里諭令知之

○諭林之望奏川軍餉銀久缺請飭速解等語鶴齡所帶川兵三營由平番調防蘭州省城因糧餉缺乏餓斃甚多川省應撥之餉何以一年之久未經解到該軍見在蘭州剿賊頗能得力亟應源

源接濟以固軍心著崇實駱秉章卽將鶴齡一軍餉銀迅速撥解
不得稍存膜視見在由川入甘之路時虞梗塞並著咨會楊岳斌
劉蓉添派兵勇協同解餉委員探明道路護送前進仍一面知照
林之望於川餉抵甘時派兵迎提務須設法解到毋得畏難坐視
致誤要需將此由五百里各諭令知之○予陝西陣亡通判周宏
謨祭葬世職○是月蜀緩江蘇銅山等二縣暨徐州衛被擾江西
蓮花等二十九廳縣被擾被水被旱新舊額賦